

Xujun xi kits'ínkjihí nda postru Pablo xuta ninku Roma

B'i ts'ín kikjaniñaha Pablo xuta ninku xi tjín nanki Roma

¹ An Pablo, an nda musu síhin Jesucristo. Ntíaná kits'ín mana nku nda postruhú tú xi k'uenijmíhina éen nda tsuhú, ² éen nda tsu xi kitsú nga tsjá nk'ie nga kits'ínkinchja já profetaha xi nkú ts'ín tjít'a xujun éhen Ntíaná, kui xi tsje.

³ Éen nda tsuu tínchjanijmíyaha Ntíhi, kui xi Nda Ntíaná Jesucristo. Nk'ie nga yjoninte kik'a, ntjehe nda rej David nibaha rá. ⁴ Ko nk'ie nga j'áiyaha ngabayoo, Espiritu Santo y'éjña chji nga kui xi Ntíhi Ntíaná xi tjíhin nga'yún. ⁵ Kitsjana kjuanda ko kits'ín mana nku nda postru ngajoho tú xi tú má k'uenijmíhi rá xuta nga tjíhin nga s'ejihin ko kuint'é'éhen. ⁶ Jun tintsúbajiun xuta xi kis'enijmíhi, kui nga xutaha Jesucristo kamahanu.

⁷ Ngayjoo xuta ninku xi tintsúbao nanki Roma títs'ínkjínúu kui xujún. Tjoho Ntíaná jun ko j'ájinúu nga kikjats'enúu.

Kas'enúu kjuanda ko kjuajyu xi tsjáná Ntia Na'miná ko Nda Ntíaná Jesucristo.

B'i ts'ín kitsúya Pablo nga mjehe ngjuaisehe xuta ninku Roma

⁸ Kui ni xu'bjí xi tjun xinnúu. Tú ngat'aha nga Nda Ntíaná Jesucristo ts'ená, tsjaha máb'achjíhi Ntíaná ngat'aha nga ja kichjubó éhen ko nga ngúsuhún

asunntee tichubanijmíyaha xi nkú ts'ín s'ejinnuu Ntíaná. ⁹ Ngayjee animana títs'inxát'aha Ntíaná nga tíb'enijmía én nda tsuhu Ntíhi, kó kui xi be nga tehente ts'inkjónuu nk'ie nga nchjaka.

¹⁰ Bankihi Ntíaná tsa kui xi mjehe katsjániyána nga kama kfínsenuu. ¹¹ At'aha mje nkjúnna skuenuu tú xi kúásinkohonuu nga sakúnuu ni xi tsjáná Espiritu Santo, tú xi ndjá kuinchahanu. ¹² Mjena nga xi nkú ts'ín nkuhú s'ejinná k'uai nga'yúnkoho raá xinkjá.

¹³ Jun já nts'e, mjena nga choo nga nkjin niyá kama mjena nga kfínsenuu tunga santahá ni nd'ai tjin ni xi tíb'échjana. Mjena ta ts'ian xá xi kitsjána Jesucristo ajinnuu xi nkú nga ta títs'ian ajihin xuta naxinantá xingisoo. ¹⁴ Tjihin nga ts'ian ajihin tú mí xutahá ni xá xi kitsjána, xuta xi nchja én griego kó xi nchja kj'ai én, xi nkjink'uhun kó xi najmi nkjink'uhun. ¹⁵ Kui nga mangimjehena nga k'uenjímihinu kó ta jun xi tintsuboo Roma én nda tsuhu Jesucristo.

B'i ts'ín kitsúya Pablo nga tjihin nga'yún én nda tsuhu Jesucristo

¹⁶ Najmi ma subana nga én nda tsuhu Jesucristo b'enijmía, at'aha kui xi nga'yúhun Ntíaná xi ts'ínk'ankikoho ngayjee xi s'ejihin, xi ntje judio tjeheh ra kó xi najmi ntje judio tjeheh ra. ¹⁷ Én nda tsuhu Ntíaná bakúchji xi nkú ts'ín Ntíaná tsjáha xuta nga naxu ma nginkun tú ngat'aha nga s'ejihin. B'a ma at'aha s'ejihin, xi nkú ts'ín tjit'a éhen Ntíaná nga b'i títsu: “Xi ja naxu nginkun Ntíaná tú ngat'aha nga s'ejihin k'uéjña tik'un.”

B'i ts'ín tsakúya Pablo nk'ie nga ngayjee xuta tjíhínjé

¹⁸ Ntíaná xi tíjña nk'a ján b'éjña chji kjuakjahan nga ts'ín nibánehe ngayjee xuta xi najmi benkjúhún kō incha ts'ín ni xi najmi naxu nginkun. Kui xuto xi b'échja nga cha ni xi naxu tjín. ¹⁹ At'aha ni xi yaha Ntíaná, kui ta incha be. Ntíaná ta y'éjña chjihí. ²⁰ Najmi tjín xi nkú ts'ín b'a incha kuitsuhu nga najmi be. At'aha xi nkúhu nga kamanda asuntee tísakúchji nga'yúhún Ntíaná xi najmi maha ndyja kō nga nkuhú kui xi Ntíaná. Kjuaxi kjáihín nga najmi ma chji Ntíaná, tunga kamankjihínná tsa chaseéhe ni xi kin'enda.

²¹ Tunga ta ndahá ni tsa incha kíkíe jóo ni xi ts'e Ntíaná, najmi incha kits'ínkie yjohó nga Ntíaná xi tjíhín kjuachánka kō ta ndaha najmi incha kitsjáha máb'achjihí. Tu sa ní ni xi najmi chumi ni chjihí ra incha kits'ínkjink'un kō incha kama jyhín. ²² Já nkjink'un chubá incha kits'ín mahá yjohó, tunga já síhí incha kama. ²³ Incha kits'ín t'axín kjuachánkaha Ntíaná, kui xi najmi maha 'me. Kits'ín tsjohó sénnístjihín xuta xi maha 'me kō sénnístjihín nísee, chu kō ye.

²⁴ Kui nga Ntíaná kits'ín ndaíhí ra xuto nga ni xi najmi ndoo incha ts'íhín, ni xi nchjaha animaha. Ta kui ta maha najmi incha kikienkjún yjonin-tehe nga ch'on kits'ínkō. ²⁵ Incha kits'ín t'axín éhen Ntíaná xi naxu tjín. Tu én tsank'óhó incha tsakj'á. Incha kikienkjún kō incha kits'ín tsjohó ni xi kin'enda antehe ni nga xi kits'ínnda niu ts'ín tsjohó, xi tjíhín nga n'etsjohó tu nkjéhé ni. B'a tjín.

²⁶ Kui nga Ntíaná kits'ín ndaíhí ra xuto nga ni

xi suba maná incha ts'ín. Jminchjín joo incha y'éntu xi nkú ts'ín tjeheñ ra nga incha ts'ínko x'ihín. ²⁷ Já x'in ya ta incha y'éntu xi nkú ts'ín tjeheñ ra nga incha ts'ínko jmichjín. Ta kuihi xinkjín x'in incha kits'ín mje. Tjihin kjuasuba ni xi incha kits'ín. Ta kuihi jáx'in incha kikjantuko xinkjín. Tunga ta incha kits'ínkjáihín ra chjí xi tjeheñ ra kjuangasten xi incha kits'ín.

²⁸ At'ahā najmi incha kits'ínsihín Ntíaná, kui nga Ntíaná kits'ín ndáihí ra nga kuatsúhun kjuankjink'uhún, tu xi incha ts'ihín ni xi najmi ma n'e. ²⁹ Kui nga kitsejín ra ngayje tíkjá ni ch'onk'un. Najmi naxu incha ts'ín, fantuko jminchjín xi najmi kjee bixan, incha fásihín ni xi tjíhín xinkjín ko ch'on incha ts'ín. Kitsejín animahā kjuaxintak'un, incha ts'ínk'ien xinkjín, ko ta kitsejín kjuachán, kjuamaña ko kjuach'onk'un. ³⁰ Nchjane xinkjín, én tsank'á ts'inne xinkjín, ts'ín unkie Ntíaná, najmi ch'a benkjún, ma ngak'un, nk'a b'asje yjoho, kjuankjintak'uhún b'asjejin nkjin tíkjá ni xi ch'onk'un, najmi nt'é'éheñ xi cháha, ³¹ si, najmi ts'íntjusun én xi nchja, najmi ch'a xi ts'íntjo, najmi ma n'e jnenta ko najmi ma nimahā xinkjín.

³² Be xuta xu'bo nga xi b'a ts'ín ngabaya tjeheñ ra, at'ahā b'a ts'ín y'éjña Ntíaná. Tunga tu nku b'ahá tijncha ts'ín ko santaha tsjo incha mahā nga kj'ái xi b'a ta ts'ín.

2

B'i ts'ín tsakúya Pablo nk'ie nga Ntíaná ts'ínkokuā ngayjee xuta

¹ Ji xi chaseih_i yá xi nda k_o yá xi najmi nda k_o t_{ín}'ek'anji jé x_utá xi k_j'aí, najmi t_{jín} nkú ts'ín n'esjenkihini yjoh_i. Nk'ie nga chaseih_i yá xi nda k_o yá xi najmi nda, t_a ji t_a maha n'ek'anji jé yjoh_i, at'ah_a ji b'a t_a n'ei. ² Yaá nga kix_i ts'ínk_okjua Nt_{ian}á x_utá xi b'a ts'ín.

³ Ji nda, ji xi chaseih_i yá xi najmi nda t_{íts}'ín k_o nk'ie nga b'a t_a n'ei, ¿a b'a bixín nga k_uitjunkihi yjoh_i nga ts'ínk_okjua Nt_{ian}á? ⁴ ¿Á t_{ín}'e t'axíh_{ín} r_i yjoh_i k_uanda chánkaha Nt_{ian}á k_o nk'ie nga t_u x_i ts'ín'yún tak'uhúnná k_o nk'ie nga t_u x_i ndahá ts'ín? ¿A najmi mankjihín r_i nk'ie nga k_ui k_uandaha Nt_{ian}á t_{íts}jániyáhi nga k'úínchj'ah_a r_i anímah_i?

⁵ Tunga t_u ngat'ah_a nga ndjá tjíyahi k_o nk'ie nga najmi t_í'michj'aih_i anímah_i, t_u sahá t_{ín}'etsenéi yjoh_i k_ua'un xi nibanehe asunntee n_{ist}jín nk'ie nga ts'ín nibá Nt_{ian}á k_uakjahan k_o ts'ín sisin k_ua.

⁶ Nk'ie b'a k_amoo, Nt_{ian}á tsjáha chj_ih_i nga nkúnkú x_utá ngat'ah_a xi nkú t_{jín} ni xi kits'ín.

⁷ X_utá xi t_u nku t_{ín}cha t_{íts}'íh_{ín} ni xi nda, xi b'a ts'ín t_íbangisjáhi nga s_akúhu k_uachánka xi tsjá Nt_{ian}á k_o nga nda ch_a k_o nga k'úéntu t_{ík}'un s_{ín}, k_ui x_utaha xi Nt_{ian}á ts'ínk'íéntu t_{ík}'un s_{íh}ín. ⁸ Tunga x_utá xi sin k_ua k_o najmi nt'é'éhen ni xi naxu t_{jín}, xi t_u sahá nt'é'éhen ni xi najmi ndoo, k_ui xi íncha ts'ínkjáih_{ín} k_ua'un xi ts'ín nibanehe Nt_{ian}á k_o k_uakjahan.

⁹ K_uanimá k_o k_uaba s_akúhu ngayjee x_utá xi ts'ín ni xi ch'onk'un, b'ah_a r_a x_utá xi ntje judio t_jehen r_a k_o xi najmi ntje judio t_jehen r_a. ¹⁰ Tunga ngayjee x_utá xi íncha ts'ín ni xi ndoo, k_ui xi s_akúhu k_uachánka xi tsjá Nt_{ian}á, nda ch_a k_o s'ehe

kjuajyu, b'ahā rā xi ntje judio tjeheñ rā kō xi najmi ntje judio tjeheñ rā. ¹¹ At'ahā namji ngabi ts'ín Ntjaná.

¹² Ngayjee xi incha kits'ín ngatitsun nga namji be kjuatéxuma xi kin'ekj'aseheñ Moise, tū nkú ndyjahá tā ndaha tsa najmi kits'ínkōkjuahā kjuatéxumoo. Kō ngayjee xi incha kits'ín ngatitsun nga ja be kjuatéxuma xi kin'ekj'aseheñ Moise, kui kjuatéxumoo ts'ínkōkjuahā. ¹³ Najmi xutā xi tū basínñjuhú rā kjuatéxumoo xi naxu ma nginkun Ntjaná. Xutā xi ts'íntjusun ní kjuatéxumoo xi naxu n'e ma.

¹⁴ Xutā xi najmi ntje judio tjeheñ rā najmi kik'aihi kjuatéxuma xi kin'ekj'aseheñ Moise tūnga ts'ínín ni xi títu kjuatéxumoo, at'ahā mankjihin ni xi nda kō ni xi najmi nda. B'a ts'ín kuenta ts'e suba sakúhu rā nku kjuatéxuma, ndaha tsa najmi tijnahā kjuatéxuma xi kin'ekj'aseheñ Moise. ¹⁵ Incha bakúchji xuto nga ajin animahā tjit'a ni xi bakúya kjuatéxumoo. Animahā tsuyahā tsa nda kō tsa najmi nda ni xi tijncha ts'ín. Kō kjuankjintak'uhun tsuyahā tsa tjeheñ jé kō tsa najmi tjeheñ ngat'ahā ni xi tijncha ts'ín. ¹⁶ B'a kama nistjin nk'ie nga Ntjaná k'uéxahā Jesucristo nga kuasehe ni xi tjintu'mahā xutā. B'a kama xi nkú títu én nda tsu xi túb'enijmía.

B'i ts'ín tsakúya Pablo nk'ie nga tā tjihin jé xutā judio ndaha tsa kui kik'aihi kjuatéxumoo

¹⁷ Ji xi b'a túbixín nga ji xi ntje judio tjeheñ ri, nga kjuatéxuma xi kin'ekj'aseheñ Moise kich'ai kō tsjo mahi at'ahā Ntja nku tutuu s'ejihin. ¹⁸ Yai ni xi mjehe Ntjaná nga n'ei. Yai má nihi xi nda at'ahā

kjuatéxumoo kisakúyahi. ¹⁹ Behe tak'uin nga mahi baku niyáíhi xuta ka ko nga ji xi nkú joyaha nku nd'í xi ts'ín ndzjehen xuta xi tjíma má jyuun. ²⁰ Ji xi bakuyáíhi xuta xi najmi be ni xi ts'e Ntíaná. Ji xi nda maestruhu xuta xi najmi mankjihin, at'aha týñahi kjuatéxuma xi bakúchji kjuankjintak'uun ko ni xi naxu tjín.

²¹ Ji xi bakuyáí, ¿a najmi bakuyáha ri yjohi? Ji xi b'enijmí nga najmi ma n'e ndyjé, ¿a n'e ndyjé? ²² Ji xi b'a bixín nga chankjáán kjuabixanná, ¿a b'a n'ei? Ji xi unchai ntia xi ntsja xuta ts'ínnda, ¿a najmi n'ei ndyjé ninkuhu ntia xu'bo? ²³ Ji xi tsjo mahi at'aha yai kjuatéxuma xi kin'ekj'asehen Moise, tunga najmi týankjún ní Ntíaná nk'ie nga tíbiyunéi kjuatéxumoo. ²⁴ B'i títsu éhen Ntíaná má nga tjít'a: “Ngat'anuu najmi týankjún Ntíaná ajihin xi najmi ntje judio tjeheh ra.”

²⁵ Chjíhi ra nga kin'ehi circumcision tsa tín'etjusuin kjuatéxumoo. Tunga tsa tíbiyunéi kjuatéxumoo, circumcision xi kin'ehi b'a ma xi nkúhu tsa najmi kin'ehi niu. ²⁶ Kui nga tsa xi najmi kin'ehe ra circumcision kj'uatjoho ni xi tjít'a kjuatéxumoo, ¿a najmi n'echjíhi ra ni xi títs'ín nga chasehe xi nkúhu tsa kin'ehe circumcision? ²⁷ Xi najmi kin'ehe circumcision yjonintehe tunga títs'íntjusahún kjuatéxumoo, kui xi k'uéjñanehi ni xi kanéhi ji xi týñahi kjuatéxumoo ko kin'ehi circumcision tunga tíbiyunéi.

²⁸ Najmi yjonintee tsuya yá xi judio, ko najmi ni xi n'ehe yjonintee xi circumcision xi ndoo. ²⁹ Judio ní xi b'a ts'ín týiyaha ko circumcision xi nda, kui ní xi ma ajin anímaha xuta. Espirituhu Ntíaná b'a

ts'íun, najmi ni xi tjit'a xujun. Xi b'a ts'ín tjiyaha, Ntíaná nda nchjanehe xuta xu'bo, najmi xuta.

3

B'i ts'ín tsakúya Pablo nk'ie nga tu nkú naxuhú ts'ín Ntíaná

¹ Kui b'a maha, ¿mí ni xi tjin saha xi ntje judio tjeheñ rā nī ma? ¿Kō má xi kui chjéheñ circuncision? ² Chjīhi rā niu, tū xi nkú ts'ín chāsehé rāá. Títjun Ntíaná kits'ínkjas'ehen xuta judio éhen. ³ Tjin xi najmi kis'ejiñin éhen Ntíaná, tunga, ¿a kuihi nihi xi ts'ín nga Ntíaná najmi ts'íintjusuhun éhen? ⁴ ¡Najmi! ¡Ndaha tsa mí yehe! Ndaha tsa tsank'á ngayjee xuta, tunga Ntíaná tū nkú ts'íhín ni xi naxu tjin. Xi nkú ts'ín tjit'a xujun éhen Ntíaná nga b'i titsu:

S'ejña chji nga ji xi naxui nk'ie nga chubai, kō n'e nganai nk'ie nga n'ekokjuahi.

⁵ Tsa kjuach'onk'unna b'ejña chji nga Ntíaná xi naxu ts'ín, ¿nkú kuixiáán nī ma? ¿A najmi naxu ts'ín Ntíaná nk'ie nga ts'ín nibájennená kjuakjahan at'aha ch'on k'aán? Nk'ie nga b'a tíxian, tínchja xi nkúhu nku nda. ⁶ ¡Ndaha tsa mí yehe najmi b'a tjin! At'aha tsa najmi naxu ts'ín Ntíaná, ¿nkú ts'ín ts'íinkokjuaha xuta?

⁷ Tunga tsa ngat'aha én tsank'á xi tínchja, kō tsa b'a ts'ín tís'ejña chjihi nga b'a tjin ni xi ts'ín Ntíaná kō sakú saha kjuachánka, ¿á b'a tíminaha nī ma nga ngatitsun tits'ian? ⁸ Ka ma rā b'i k'úhiñ xinkjá kai: “Ch'on n'eé tū xi nda kamaha asunntej.” B'a tijncha tsu xi tijncha nchjayanenī nga kui niu xi tijncha bakuyái. Nda tjin nga s'ejñanehe mí nihi xi kanéhe xi b'a tijncha tsuu.

B'i ts'in tsakúya Pablō nk'ie nga najmi tjin xi bichú ma naxu nginkun Ntíaná tu ngat'aha nga ts'intjusun kuatéxumoo

⁹ ¿Nkú kuixíáán nī ma? ¿A 'yún nda sai jin xi ntje judio tjeheenni nga xuta xi najmi ntje judio tjehe n ra? ¡Najmi! ¡Ndaha tsa mí yjehe! At'aha ja kuayaá nga xi judio ko xi najmi judio nkuhú ngatitsuun tjin tujin. ¹⁰ Xi nkú ts'in tjit'a éhen Ntíaná nga b'i titsu:

Najmi tjin xi naxu nginkun Ntíaná,
ndaha nku najmi tjin.

¹¹ Najmi tjin xi mankjihin,
najmi tjin xi bangisjai nga skue yáha Ntíaná.

¹² Ngayjee kindyajihin niyóo,
nkuhú nga tsatsuhun animaha.

Najmi tjin xi nda ts'in, ndaha nku najmi tjin.

¹³ Ngabaya y'aha ra ni xi tsu,
tu subahá én tsank'á nchja.

Én xi bitju ts'a b'a joyaha xahan ye,

¹⁴ kitsehe ts'a én ch'on tsu ko én stinta.

¹⁵ Kitsa b'ema nga ts'ink'ien anima,

¹⁶ ni xi incha ts'in ts'in x'ahan xuta ko kjuanima
tsjáha.

¹⁷ Najmi incha be má tjin kjuajyu,

¹⁸ najmi incha tjinjin tak'un

nga Ntíaná xi tjihin nga chanjún.

¹⁹ Yaá nk'ie nga xuta xi tijnanehe kjuatéxuma xi kin'ekjas'ehen Moise, kjuatéxumoo tinchjakoho xuta xu'bo tu xi nk'ie nga kuasehe ra Ntíaná mí nihi xi kits'in xuta najmi ta incha kuinchjaha nga najmi ta kuitjunkihi ra yjoho. ²⁰ At'aha ndaha nku najmi naxu chaha nginkun Ntíaná tu ngat'aha tsa

ts'íntjusun ni xi tjí't'a kjuatéxumoo. At'ahā tū sa ní kjuatéxumoo b'éjña chjíná nga tjíná ngatitsun.

B'i ts'ín tsakúya Pablo nk'ie nga tū ngat'ahā nga s'ejihín xutā Jesucristo naxu bichú ma nginkun Ntíaná

²¹ Tunga nd'ai ja y'éjña chji Ntíaná xi nkú ts'ín naxu ma xutā nginkun. Najmi kjuatéxumoo xi mahā b'a ts'ín. Santa níhi ma n'eya ní ajihi xujun kjuatéxuma xi kin'ekjas'ehen Moise kō ni xi y'é't'a já profeta. ²² Ngat'ahā ní nga s'ejihín xutā Jesucristo, b'a ts'ín naxu maha nginkun Ntíaná. Kō b'a maha ngayjee xi s'ejihín, at'ahā najmi ngabi ts'ín Ntíaná. ²³ Tū ngat'ahā nga ngayjee xutā kits'ín ngatitsun, ndaha nku najmi sakúhu kjuachánka xi Ntíaná tsjá.

²⁴ Tunga chánkahá kjuandahā Ntíaná xi tū títsháhá nga naxu kama xutā nginkun, at'ahā Jesucristo y'échjintjai xutā kō kits'ín ndáihí jéhe. ²⁵ Kui xi Ntíaná kits'ín ma nku chje. Tsaténdzjo jníhi tū xi sakúhuná kjuan'endyjat'a nk'ie nga s'ejinná Jesucristo. B'a ts'ín tsakúchjihi Ntíaná nga naxu ts'ín. Nístjin nk'ie, tū ngat'ahā nga tsenta najmi kits'ínnijéhe rá xutā ngatitsun xi kits'ín. ²⁶ Tunga nístjin nd'ai ja tsakúchji nga naxu ts'ín kō nga tū nku naxuhú títsh'ín nk'ie nga títsháhā xutā nga naxu ma nginkun tū ngat'ahā nga s'ejihín Jesucristo.

²⁷ Kui b'a maha, ¿a tjin nkú ts'ín kama nk'a n'esjehená yjoná nginkun Ntíaná at'ahā ngat'ahā kjuatéxuma xi kin'ekjas'ehen Moise naxu kama-haná nginkun? Najmi kama. S'ejña t'axín ni xu'bō tū ngat'ahā nga s'ejinná Jesucristo. ²⁸ At'ahā mankjinná nga ma naxu xutā nginkun Ntíaná tū

ngat'ahā nga s'ejih̄in Jesucristo, najmi ngat'ahā tsa ts'íntjusun ni xi t̄jít'a k̄juatéxumoo.

²⁹ ¿A t̄u nkuhú Nt̄iaha xut̄a xi nt̄je judio t̄jehen ra Nt̄ianá? ¿A najmi kohó Nt̄iaha xut̄a nax̄inantá xingisoo? Johon, b'a t̄jín. Nt̄ianá t̄a Nt̄iaha xut̄a xi najmi nt̄je judio t̄jehen ra. ³⁰ At'ahā nkuhú maha Nt̄ianá xi ts'ín nga nax̄u ma xut̄a judio xi kin'ehe ni circuncision at'ahā s'ejih̄in, k̄o t̄a tsjá nga nax̄u ma xut̄a xingisoo xi najmi kin'ehe ni circuncision t̄u ngat'ahā nga s'ejih̄in. ³¹ Kui nga, ¿a t̄ín'endyanáá ch̄j̄ih̄i k̄juatéxumoo t̄u ngat'ahā nga s'ejinná? ¡Najmi b'a t̄jín! T̄u sa ní b'a ts'ín tí'b̄aih̄i raá ch̄j̄i xi t̄jih̄in k̄juatéxumoo.

4

B'i ts'ín y'éjña chubayaha Pablo nga kits'ínchjén nt̄je cháha xut̄a judio xi 'mi Abraham

¹ Chubanijmíyahaná nt̄je cháná Abraham. ¿Mí nihi xi kisakúhu? ² Tsa Nt̄ianá kits'ínkjáih̄in Abraham nga kui xi nax̄u t̄u ngat'ahā ni nda xi kits'ín, k̄a ma ra nk'a k'uas̄je yjoh̄o. Tunga najmi kamahá nk'a k'uas̄je yjoh̄o nginkun Nt̄ianá. ³ ¿Nkú t̄itsu éhen Nt̄ianá ngat'a ts'e ni xu'bo? B'i t̄itsu: “Kis'ejih̄in Abraham Nt̄ianá k̄o kui niu xi kits'ínchj̄ih̄i ra Nt̄ianá nga Abraham xi nku nda xi nax̄u.”

⁴ Xi nkúhu xut̄a xi ts'ínxá, kui xi ch'axk̄ih̄i ni xi ts'ín k̄o b'a ts'ín s'echj̄ih̄i ra. Najmi t̄u 'b̄aih̄i ni xi ts'ínkjáih̄in. ⁵ Tunga máha xut̄a xi najmi ma 'yún k'un ni nda xi kits'ín, nga t̄u sahá s'ejih̄in Nt̄ianá xi tsjáha xut̄a ngatitsuun nga nax̄u ma nginkun,

Ntɔ́áná be nga xuto s'ejihín kò kui niu xi b'axkihí
Ntɔ́áná nga naxu basehe.

⁶ B'í kitsú David nga: ¡Á b'a nda tjihin ts'e xuta xi
Ntɔ́áná naxu basehe, najmi tu ngat'ahá ni xi kits'ín
tsa kui kjuáha nga naxu n'e ma! ⁷ B'í ts'ín y'é't'a:

¡Á b'a nda tjihin ts'e xuta
xi kin'endyjat'ahá rá jéhe,
kò kin'endyjajnuhu ngatitsuhún!

⁸ ¡Á b'a nda tjihin ts'e nda
xi Ntɔ́áná najmi b'axkihí rá ngatitsuhún!

⁹ ¿A tu nkuhú xuta xi kin'ehe ni circumcision
sakúhu kjuanda xi títsu David, a rá kohó xi najmi
kin'ehe ni circumcision? Ja b'a kuixíáán nga Abra-
ham kis'ejihín Ntɔ́áná kò nga kui niu xi kin'echjíhi
rá nga naxu kin'e ma. ¹⁰ Tunga, ¿nkjé kin'echjíhi
rá Abraham nga kui xi nku nda xi naxu? ¿A nk'ie
nga ja kin'ehe ni circumcision, a rá nk'ie nga najmi
kjhé n'ehe ni circumcision? Nk'ie nga najmi kjee
n'ehe ni circumcision b'a kama.

¹¹ Askahan kin'ehe Abraham ni circumcision.
Kui niu xi kama nku chubá xi kis'et'ahá, chubá xi
tsuhu rá nga naxu kama at'ahá kis'ejihín Ntɔ́áná
nk'ie nga najmi kjee n'ehe ni circumcision. B'a
ts'ín j'ai maha Abraham na'mihí ngayjee xuta xi
s'ejihín Ntɔ́áná, ndaha tsa najmi kin'ehe ni cir-
cuncision. Ntɔ́áná b'axkihí xuta xu'bo xi nkúhu
xuta xi naxu. ¹² Kò tá j'ai má Abraham na'mihí
xuta xi kin'ehe ni circumcision, xi najmi tu nkú ni
circuncision kin'ehé rá, kò ní tá s'ejihín Ntɔ́áná xi
nkú ts'ín kis'ejihín ntjé chána Abraham nk'ie nga
najmi kjee n'ehe ni circumcision.

B'i ts'in tsakúya Pablo nk'ie nga kits'intjusun Ntjaná ni xi kitsúya títjuhun Abraham

¹³ Ntjaná kitsúya títjuhun Abraham nga kui kō ntje xi s'ehe askahan ts'ínkjáihin asunntee nga kama ts'e. Tunga najmi ngat'aha ní tsa kits'intjusun Abraham kjuatéxuma xi kin'ekjas'ehen Moise, tsa kui kjuaha nga b'a kik'in títjuhun ra. B'a ní kik'ihin at'aha kis'ejihin Ntjaná kō kui niu xi kich'axkihí ra nga kui xi naxu. ¹⁴ At'aha tsa xi tíncha ts'intjusun kjuatéxumo, tsa kui xi ts'ínkjáihin ní xi kitsúya títjun Ntjaná nga tsjá, kui xi tsuhu ra nga najmi chumi ní chjihí ra nga s'ejihin xuta Ntjaná kō najmi ta chumi ní chjí kamaha ra én xi kitsúya títjun Ntjaná. ¹⁵ Nk'ie nga biyuné kjuatéxuma xi kin'ekjas'ehen Moise, kjuakjahan Ntjaná ts'in nibánehe xuta. Tunga má najmi tjín kjuatéxumo, najmi tjín xi nkú ts'in kuiyúnehe ní xi títu.

¹⁶ Kui b'a maha, at'aha ní nga s'ejihin xuta Ntjaná, kui kjuaha nga sakúhu ra ní xi kichuba títjun, tu xi ngat'aha kjuandaha Ntjaná sakúhu ra ngayjee ntjehe Abraham ní xi kichuba títjun. Najmi tu nku xi y'aha ra kjuatéxumo xi sakúhu niu. Ta sakúhu xi s'ejihin Ntjaná xi nkú ts'in kis'ejihin Abraham Ntjaná. Kui xi na'miná ngatentee ¹⁷ nginkun Ntjaná xi nkú ts'in tjit'a, má nga b'a kitsúhu Ntjaná Abraham: “Ji xi kits'in maha na'mihí nkjin xuta naxinantá.” Kis'ejihin Abraham Ntjaná, kui xi ts'ínk'íentu tít'un xuta k'ien kō tu ts'ínkjohó ní xi najmi kjee tjín, as'ai s'e.

¹⁸ Abraham kikuyá ní xi kik'ihin kō kama na'mihí nkjin nkjún xuta naxinantá at'aha kis'ejihin Ntjaná, ndaha tsa najmi tjín xi nkú

ts'ín kuitjusuhun niu. Kama xi nkú nga kik'ihin: “B'i ts'ín nkjin kama ntjehi.” ¹⁹ Tu nkú kis'ejiñin ra Abraham, ndaha tsa kamankjihin nga ja tu xí nibajehén ra yjonintehe at'aha ja ma kfehé ra unchan nú ko tsa ngat'aha nga ntí Sara xi chjuúhun maha. ²⁰ Najmi jo jan kamaha tsa najmi ta kis'ejiñin ra ni xi kitsúya tíjuhun Ntíaná nga tsjáha. Tu sahá ndjá tsasinjña sa nga kis'ejiñin ko kits'ínkie yjoho nga chánka Ntíaná. ²¹ Y'énku k'un nga tjiñin nga'yún Ntíaná ko nga kamaha ts'íntjusun ni xi kitsúya tíjuhun. ²² Kis'ejiñin Abraham Ntíaná ko Ntíaná kits'ínchjíhi ra niu nga Abraham xi nku nda xi naxu.

²³ Má nga tjit'a nga Ntíaná kits'ínchjíhi ra nga kis'ejiñin Abraham, najmi tu nkuhú ngandaha Abraham kis'et'a niu. ²⁴ Nganda níná kis'et'aha niu. Ta n'echjíná ko ñá xi nkúhu xuta xi naxu at'aha s'ejinná Ntíaná xi kits'ínkj'áiyaha ngabayoo Nda Ntíaná Jesu. ²⁵ Kui xi kin'ek'ienntjáíhi ngatit-sunná ko kin'ekj'áiya ngáha ra ngabayoo tu xi ta kamahaná xuta xi naxu nginkun Ntíaná.

5

B'i ts'ín tsakúya Pablo nk'ie nga nd'ai tjínkoná kjuajyu Ntíaná

¹ Kui b'a maha, naxu kamaá nginkun Ntíaná at'aha s'ejihinná Ntíaná ko tjínkoná kjuajyu ngat'aha ni xi kits'ín Nda Ntíaná Jesucristo. ² At'aha s'ejinná Ntíaná, kui nga Jesucristo kits'ihin nga tsitjas'enjihinná kjuanda xu'bi. Ndjá tinchaján kjuandoo. Kui nga tsjo mahaná nk'ie nga tichuyáá kjuachánka xi tsjáná Ntíaná.

³ Ko najmi tū nku ni xu'bi xi tsjo maná. Ta tsjo maná kjuá'un xi t́bitjajíáán, at'ahá yaá nga kjuá'uun tsjá nga'yúnná tū xi n'e ch́ukjuáhaná ni xi t́mat'aán. ⁴ Ko tsa n'e ch́ukjuá, kixi bitjukaá ni xi t́maná. Ko tsa kixi bitjukaá ni xi t́maná, ma chuyáá ni nda xi tsjáná Nt́ianá. ⁵ Ko najmi sakúná kjuasuba, ndaha tsa najmi kjee tíyáá ni xi t́chuyáá. At'ahá Espiritu Santo xi kik'ainá kits'íntsej́ihin anímaná kjuatjohó Nt́ianá.

⁶ Nk'ie najmi kama kin'ek'anki subáá yjoná, Cristo k'ienntjáíhi xutá ngatitsuun nístjin xi kitsú Nt́ianá. ⁷ 'Ni t́jín tsa t́jín xi kuayántjai nku xutá xi naxu ts'ín, tunga kutsa t́j́hín xi kama k'un kuayántjai nku xutá xi 'yún nda. ⁸ Tunga Cristohó k'ienntjáíhiná nk'ie nga xutá ngatitsun saá. B'a ts'ín tsakúchj́ihi Nt́ianá xi nkú ts'ín tjohó ñá.

⁹ Nk'ie nga ja xutá xi naxu kamaá nginkun Nt́ianá ngat'ahá jní xi tsaténdzjo Cristo, ¿nkú ts'ín najmi n'ek'ankihiná nístjin nga ts'jín nibájen kjuakjahan Nt́ianá? ¹⁰ At'ahá nk'ie nga kamaá xutá kontrahá Nt́ianá, ngat'ahá ngabayahá Nt́íhi kinchjako ndaná. ¿Nkú ts'ín najmi n'ek'ankiná ngat'ahá kjuatík'uhun Nt́íhi, ñá xi ja nchjako ndaná nd'ai? ¹¹ Ko najmi tū suba ni xu'bi t́chuyáá. Ta tsjo maná nga Nt́ianá kjuáts'ená, at'ahá Nda Nt́ianá Jesucristo kits'ín nga t́bichúk'un ngáha raá Nt́ianá.

B'i ts'ín tsakúya Pablo nk'ie nga Adan j'aiko ngabayoo tunga Jesucristo kits'ínk'íentu t́k'unná

¹² Ngat'ahá ni xi kits'ín nku nda ngatitsuun jas'en asunntej ko ngatitsuun j'aiko ngabayoo. B'a ts'ín ngjindjuhu ngabayoo ajih́in ngayjee xutá, at'ahá ngayjee xutá kits'ín ngatitsun. ¹³ Kintehe

ni nga Nt̃iáná kits'ínkjas'eheñ Moise kjuatéxumoo kis'e ngatitsun asunnteí, tunga najmi ch'axkihí ra ngatitsun xi ts'ín xuta nk'ie nga najmi kjee tjín kjuatéxumoo. ¹⁴Yahá nk'ie nga nistjihin Adan santaha nistjihin Moise tsatéxuma ngabayoo. Ta k'ien xi najmi kits'ín ngatitsun xi nkúhu xi kits'ín Adan. Adan, kui y'ejña chubayaná xi kj'uai askahan.

¹⁵Kjuandaha Nt̃iáná najmi b'a joyaha xi nkúhu ngatitsun xi kits'ín Adan. At'aha ngat'aha ngatitsuhun nku nda nkjin xuta k'ien, tunga ngat'aha kjuandaha nku nda, kui xi Jesucristo, nkjin xuta 'yún kisakúhu kjuandaha Nt̃iáná ko ni xi tu kitsjáhá ra. ¹⁶Ko ni xi tu kitsjáhá Nt̃iáná najmi b'a joyaha xi nkúhu ni xi y'aha ra ngatitsuhun Adan. Ngat'aha nku ngatitsun xi kits'ín Adan, Nt̃iáná kits'innijéhe ko b'a ts'ín je y'ejñajihin. Tunga askahán ni nga kis'e nkjún ngatitsun, tu kitsjáhá Nt̃iáná nga naxu kama xuta nginkun. ¹⁷Ngat'aha ngatitsun xi kits'ín nku nda tsatéxuma ngabayoo, tunga ngat'aha ní nku nda, kui xi Jesucristo, incha k'úentu tík'un ko kuatéxuma xuta xi ts'ínkjáihin kjuanda chánkaha Nt̃iáná ko k'uaihi nga naxu kama nginkun.

¹⁸Kui b'a maha, xi nkú ts'ín tu ngat'aha nku ngatitsun xi kits'ín nku nda je y'entujihin ngayjee xuta, b'a ta ts'ín tu ngat'aha nku ni nda xi kits'ín nku nda naxu bichú ma ngayjee xuta nginkun Nt̃iáná ko k'úentu tík'un. ¹⁹Xi nkú kama nga najmi kint'één nku nda ko kui nga nkjin xuta tsichu maha xuta ngatitsun, b'a ta kama nga kint'één nku nda ko kui nga nkjin xuta naxu kuichú maha nginkun Nt̃iáná.

²⁰ Kō tā j'ai s'ejña kjuatéxuma xi kin'ekjas'eheñ Moise tū xi sáha ngatitsuun, tūnga nk'ie nga ja kisá ngatitsuun, 'yún kisá sa kjuandaha Ntjaná. ²¹ At'aha xi nkú ts'ín kis'ehe nga'yún ngatitsuun kō j'aiko kjuabayoo, b'a tā ts'ín tjiñin nga'yún kjuandaha Ntjaná, kui xi ts'ín nga naxu mahaná nginkun kō ts'ínk'íentu tík'un sínna ngat'aha ni xi kits'ín Nda Ntjaná Jesucristo.

6

B'i ts'ín tsakúya Pablo nk'ie nga ja tsayahaá ngatitsuun kō nga tintsuba tík'unkaá Cristo

¹ Kui b'a maha, ¿nkú kuixíhinná? ¿A tū nku n'enáhá ngatitsun tū xi 'yún s'ejña chji saha kjuandaha Ntjaná? ² ¡Najmi! ¡Ndaha tsa mí yjehe! Ja tsayahaá ngatitsuun. ¿Nkú ts'ín kuintsubajin sahaná ngatitsuun? ³ ¿A najmi yanú ni xu'bi? Ngatentee xi kisaténtájián Jesucristo nkuhú ja makaá kō nkuhú ja tsichu majihín ngabayaha. ⁴ Nk'ie nga kisaténtájián Cristo, b'a ts'ín tsayakohoná kō kis'eyanjikaá, tū xi kuintsuba tík'un tsetse ngáhaná xi nkú ts'ín Ntja Na'miná kits'ínkj'áiyaha Cristo ngabayoo nk'ie nga tsakúchji kjuachánkaha.

⁵ At'aha tsa nkuhú tsichu makaá Cristo nk'ie nga k'ien, b'a ts'ín tā nkuhú kuichú makaá nga kj'uaíya ngáhaná xi nkú ts'ín j'áiyá ngáha rá ngabayoo. ⁶ Yaá nk'ie nga kisut'a kruukaá Cristo. Najmi b'a tā ts'ín tintsubahaná xi nkúhu nk'ie. Ja tsatsun yjonintená xi tjiñajihín ngatitsun tū xi najmi tā kuinú'yá'éheñ ráá ngatitsuun. ⁷ At'aha xi 'me, najmi tā tjiñ xi nkú ts'íñin rá ngatitsuun.

⁸ Tsa ja tsayakaá Cristo, ta s'ejinná nga ta kuintsuba tik'unkaá. ⁹ Yaá nga Cristo j'áíya ngáha ra ngabayoo ko najmi ta kuayá saha. Najmi ta tjihin ra nga'yún ngabayoo tsa nkú ts'ín saha. ¹⁰ At'aha nk'ie nga k'ien Cristo, nkuhú niyá k'iehen tu xi kikjexihin ra nga'yún xi tjihin ngatitsuun. Ngat'a ts'e nga tijná tik'un, tijná tik'un xi nkú ts'ín mjehe Ntjaná. ¹¹ Ko máha jun, b'a ta ts'ín n'enkjintak'un nga ja tsayoho ngatitsuun ko tintsuba tik'un xi nkú ts'ín mjehe Ntjaná, nga nkuhú makoo Jesucristo.

¹² Kui b'a maha, najmi tu 'baintehe ruu ngatitsuun tsa kui xi kuatéxumaha yjonintenuu xi maha 'me, tsa kuinú'yá'óhoon nga n'oo ni xi mjehe yjonintenuu. ¹³ Najmi tu ngatitsuun 'boho yjonintenuu, tsa ni xi najmi nda n'oo. Tu sa ní Ntjaná tjohon yjonuu, jun xi ja tsayo ko j'áíya ngáhanuu ngabayoo. Tjohon yjonintenuu Ntjaná nk'ie nga n'oo ni xi naxu n'e. ¹⁴ Najmi ta kuatéxumahanuu ngatitsuun, at'aha najmi ta kjuatéxumoo tijnanehenuu. Kjuandaha ní Ntjaná tintsubankiu nd'ai.

B'i ts'ín tsakúya Pablo nk'ie nga najmi ta batéxumahaná ngatitsuun

¹⁵ Ei ni ma, ¿a n'eé ngatitsun, tsa najmi ta kjuatéxuma xi kin'ekjas'ehen Moise tijnanehená, at'aha kjuandaha Ntjaná tintsubankiá? ¡Najmi! ¡Ndaha tsa mí yjehe! ¹⁶ ¿A najmi yanú, tsa tjin xi n'ekjas'ohoon yjonuu nga kuinú'yá'óhoon xi nkúhu xuta musuhu, jun xi bichúmo xuta musuhu xi tinu'yá'óhoon? Tsa xuta musuhu ngatitsuun kamo, kuayó. Tunga tsa kuinú'yá'óhoon Ntjaná, naxu kamo nginkun. ¹⁷ Jun xi kamo xuta

musuhū ngatitsuun n̄stjin nk'ie, tūnga nd'ai máb'achj́íhī rā Nt̄ianá nga tū sahá ngayjehe animanūu t́inu'yá'óhōon én xī tsinchiyó, én xī kin'ekjas'ennūu. ¹⁸ Ja kamandoóhō ngatitsuun kō tsichumo xutā musuhū ni xī naxū t́jín.

¹⁹ Tíb'ejñá chubayanūu ni xu'bī nga t́inchjakonūu at'ahā 'nī mankjinná n̄jī. N̄stjin nk'ie, nī xī chuntí nginkun Nt̄ianá kō kjuach'onk'uun kin'ekjas'ohōon yjonintenuu tū xī ch'on kin'ehenu. Xutā musuhū niū kamo, tūnga nd'ai n'ekjas'on yjonintenuu nga kamo xutā musuhū ni xī naxū t́jín tū xī xutā xī ts'e Nt̄ianá kamahanu.

²⁰ Nk'ie nga kamo xutā musuhū ngatitsuun, k̄jin tintsuḃohō ni xī naxū t́jín. ²¹ ¿Mí nihi xī kisakúnūu nga kin'o ni xī kin'o nk'ie, nī xī tū subahá manūu nd'ai? Ngabaya y'ahā rā ni xī kin'o. ²² Tūnga nd'ai ja kamandoóhō ngatitsuun kō yjankihūu Nt̄ianá. T́isakúnūu kjuaje xī tsj́ánūu Nt̄ianá tū xī kūintsuḃa t́ik'un síhinu. ²³ At'ahā ngabayoo, kui xī chj́íhī ngatitsuun, tūnga Nt̄ianá tū tsj́áhá nga k'úéntu t́ik'un sín xutā xī nkuhú mako Nda Nt̄ianá Jesu-cristo.

7

B'i ts'ín y'éjña chubaya Pablo nga ja tsayahaá kjuatéxumoo

¹ Jun já nts'e, t́inchjakonūu jun xī yo kjuatéxuma xī kin'ekjas'ehen Moise. ¿A najmi yanú nk'ie nga t́jintu t́ik'un sa xutā y'ahā kjuatéxumoo? ² Xī nkúhu nku tachjuún xī t́jñahā x'ín, t́jít'a kjuatéxumoo nga najmi t́jihin nga k'uéjña x'ihín. Tūnga tsa kuayá x'ihín, kama ndaí ngáha rā yjohō kjuatéxumaha

kjuabixoon. ³ Kui nga tsa kj'aí nda k'úéjñako_{ho} nk'ie nga tǵña sa x'ih̄in, tǵbangane kjuabixah̄an. Tunga tsa kuayá x'ih̄in, kama ndaí ngáha ra yjoh̄o ni xi tǵít'a kjuatéxumoo. Najmi tǵbangane kjuabixoon tsa kj'aí nda k'úéjñako_o ngáha.

⁴ B'a ta kamanuu, já nts'ena. Xi ja k'ien najmi ta y'aha ra kjuatéxumoo, ko jun ja tsayakoo Cristo nk'ie nga k'ien tu xi kj'aí xi kama ts'e ngáhanuu. Xi j'áíya ngáha ra ngabayoo, kui xi ts'enuu nd'ai. B'a ts'ín kama n'ehená ni xi ts'e Ntǵaná. ⁵ Nk'ie nga kich'a saá asuntee, ngatitsuun kits'ínxájin yjonintená. Ngatitsuun kits'ínchjén kjuatéxumoo nga kin'e mjeé ni xi najmi nda, ko kin'eé ni xi tjeheh ra ngabaya. ⁶ Tunga nd'ai ja najmi ta kjuatéxumoo tǵñanehená, at'aha ja tsayahaá kjuatéxuma xi kik'íét'a'yúnná nǵstjin nk'ie. Kui nga tǵn'ehená ni xi mjehe Ntǵaná nd'ai xi nkú ts'ín tǵbakú nǵyá tsetsená Espirituh̄u Ntǵaná, najmi xi nkú ts'ín tsakú nǵyáná xujun xi kis'et'a nǵstjin nk'ie.

B'i ts'ín tsakúya Pablo xá xi tǵh̄in kjuatéxumaha Ntǵaná

⁷ Ei nǵi ma, ¿nkú kuixíaán? ¿A kjuatéxuma xi kin'ekjas'ehen Moise y'a ngatitsun? ¡Najmi! ¡Ndaha tsa mí yjehe! Tunga tsa najmi kis'ejña kjuatéxumoo, najmi kikié ra ni xi 'mih̄i ngatitsun. Najmi be tsa najmi nda tǵín nk'ie nga ni xi tǵh̄in xuta kjuasíh̄in tsa najmi b'ǵi tǵtsu kjuatéxumoo: “Najmi tu fasih̄in ni xi tǵh̄in xuta.” ⁸ Tunga ngatitsuuh̄un kits'ínchjén ni xi tǵít'a kjuatéxumoo ko b'a ts'ín kinchjahana nga jasíh̄in nkjin tǵká ni xi najmi an ts'an. At'aha tsa najmi tǵín kjuatéxuma, najmi tǵh̄in nga'yún ngatitsuun.

⁹ Xi nkúhu an. Nk'ie nga najmi kjee s'ejñanena kjuatéxuma xi kin'ekjas'ehen Moise, tsátejña tík'an. Tunga nk'ie nga kamankjinna ni xi tjít'a kjuatéxumoo, kisakú nga'yúhún ngatitsuun, as'ai tsaya. ¹⁰ Kikie nga kjuatéxuma xi tjíhin nga ts'íink'íejña tík'unna, kui xi tū sahá kits'ínkjina ngabayoo. ¹¹ At'ahā ngatitsuun kits'ínchjén ni xi tjít'a kjuatéxumoo tū xi ts'anachahana. B'a ts'ín kits'ínk'ienkohona ni xi tjít'a kjuatéxumoo.

¹² Jehé kjuatéxumoo, kō ni xi tjít'a kjuatéxumoo je kō naxū tínchjā kō nda. ¹³ Tunga, ¿a ni xi ndoo xi kitsjána ngabaya? ¡Najmi! ¡Ndaha tsa mí yjehe! Ngatitsuun ní kits'ínchjén ni xi ndoo nga kitsjána ngabaya tū xi chāha nga kui xi ngatitsun. Ni xi tjít'a kjuatéxumoo tsakúchji nga tū xí 'yúhún ch'onk'un ngatitsuun.

B'i ts'ín tsakúya Pablo ni xi ts'íhin ngatitsuun

¹⁴ Yaá nga kjuatéxumoo ajihin Espirituhu Ntíaná tsitjuhu, tunga an asunntee y'ahana. Ja ts'atsena ngatitsuun kō an kama nda musuhu. ¹⁵ Najmi mankjina ni xi ts'ian. At'ahā najmi ni xi mjena ts'ian. Tū sa ní ni xi najmi sasínna, kui nihi xi ts'ian. ¹⁶ Tunga tsa ts'ian ni xi najmi mjena ts'ian, ni xi tít'sian tít'sínkiékohona yjonā nga nda kjuatéxumoo. ¹⁷ Kui nga najmi tā an xi b'a ts'íhinna nga b'a ts'ian. Ngatitsun xi tijnajin nína xi b'a ts'ín.

¹⁸ Be nga xi nkú ts'ín y'ahana asunntee, ndaha nku ni xi nda najmi tijnajinna. At'ahā ndaha tsa mjena ts'ian ni xi nda, tunga najmi chúkjuahána b'a ts'ian. ¹⁹ Najmi ts'ian ni xi nda xi mjena ts'ian, tū sa ní ni ch'onk'un xi najmi mjena ts'ian. ²⁰ Tsa

ts'ian ni xi najmi mjena ts'ian, najmi ta an xi b'a tít's'ihinna. Ngatitsun xi tǐjñajin nína xi b'a tít's'íun.

²¹ Mankjinna ni xu'bj. Nk'ie nga mjena ts'ian ni xi nda, tu ni ch'onk'un xi tǐjñajihinna bitjuchji. ²² Tsjo maha animana kjuatéxumaha Ntíaná, ²³ tunga mankjihinna nga kj'aí kjuatéxuma tít's'ínxájin yjonintena, kui xi kjuatéxumaha ngatitsuun. Kui xi kjánko kjuatéxuma xi tsjániyáha kjuankjintak'unna. F'akj'ánijéna ko ts'ín mana nda nubayáha.

²⁴ ¡Nima rú ts'ihinna! ¿Yá xi kuasinkona tu xi kama ndáhi ra yjoninte xu'bj xi tít's'ána ngabaya? ²⁵ ¡Tsjaaha máb'achjǐhi Ntíaná! Nda Ntíaná Jesucristo kits'ín ndáina. Tít's'inchjén kjuankjintak'unna nga tǐnt'e'éhen kjuatéxumaha Ntíaná, tunga xi nkúhu nku nda, kjuatéxumaha ngatitsuun tǐnt'e'éhen.

8

B'i ts'ín tsakúya Pablo nk'ie nga Espirituhu Ntíaná ts'ínk'íentu tǐk'unná

¹ Kui b'a maha, najmi ta chumi nihi ta n'enijéhe ra xuta xi nkuhú mako Cristo Jesu, ² at'aha Espirituhu Ntíaná ts'ínk'íentu tǐk'unkóna Cristo Jesu ko tsjáná nku kjuatéxuma xi ts'ín ndáiná kjuatéxumaha ngatitsuun ko ngabayoo.

³ Ni xi najmi kamaha kits'ín kjuatéxuma xi kin'ekjas'ehen Moise at'aha asunntee y'aha ra xuta ko najmi kamaha ts'íintjusun ni xi tǐjt'a, kui nihi xi kits'ín Ntíaná nga kits'ín nibá Ntǐhi. Ntǐu kik'a yjoninte xi nkúhu yjoninte ngatitsuhun xuta tu xi y'échjǐntjaihi ngatitsuun. B'a ts'ín

kik'o_{jenn}kihi Nt_{ianá} ngatitsun xi t_{ij}ñajih_{in} x_{ut}a.
⁴ B'a kits'ín Nt_{ianá} t_u xi k_{uit}jusus_{hun} ajinná ni nda
 xi banki k_{juat}éxumoo, ñá xi najmi t_a tintsu_{bahaná}
 xi nkú ts'ín mjehe yjonintená. Tintsu_ba nínáá xi
 nkú ts'ín mjehe Espiritu_{hu} Nt_{ianá}.

⁵ At'ah_a xi asuntee y'ah_a r_a nga t_{ij}ntu, kui xi ni
 xi ts'e asuntee ts'ínkjink'un, t_{unga} xi Espiritu_{hu}
 Nt_{ianá} y'ah_a r_a nga t_{ij}ntu, kui xi ni xi ts'e Espiritu_{hu}
 ts'ínkjink'un. ⁶ Xi ni xi ts'e asuntee ts'ínkjink'un,
 kui xi kuayá, t_{unga} xi ni xi ts'e Espiritu_{hu} Nt_{ianá}
 ts'ínkjink'un, kui xi k'úéntu t_{ik}'un k_o s'ehe k_{juaj}yu.
⁷ At'ah_a xi ni xi ts'e asuntee ts'ínkjink'un, kui xi
 unkie Nt_{ianá}. Najmi t_{ij}ntunkí k_{juat}éxumaha Nt_{ianá}
 k_o najmi maha tsa b'a incha ts'ín. ⁸ Xi asuntee
 y'ah_a r_a nga t_{ij}ntu, kui xi najmi maha ts'ín ni xi
 tsjoh_o Nt_{ianá}.

⁹ Tunga máha jun, ja najmi t_a asuntee
 y'ahanu_u nga tintsu_boo. Espiritu_{hu} ní Nt_{ianá}
 y'an_uu nga tintsu_boo tsa k_{juaxi} nga kui xi
 t_{ij}ñajinnu_u. Xi najmi t_{ij}ñajih_{in} Espiritu_{hu}
 Jesucristo, kui xi najmi Jesucristo ts'ehe.
¹⁰ Tunga tsa Cristo t_{ij}ñajinnu_u, tsuhu r_a nga
 Espiritu_{hu} t_{its}'ínk'íéntu t_{ik}'unn_u k_o ja naxu
 tsichumo nginkun Nt_{ianá}, ndaha tsa ngatitsu_{un}
 ja kits'ínk'ien yjonintenu_u. ¹¹ Tsa Espiritu_{hu}
 xi kits'ínkj'áiyah_a Jesu ngabayoo t_{ij}ñajinnu_u,
 t_a kuihi xi kits'ínkj'áiyah_a Jesu t_a ts'ínk'íéntu
 t_{ik}'un yjonintenu_u xi maha 'me. B'a ts'ínkonu_u
 Espiritu_{hu} Nt_{ianá} xi t_{ij}ñajinnu_u.

¹² Kui b'a maha, já nts'e, ja najmi t_a t_{ij}hin tsa
 ku_{intsu}baá xi nkúhu x_{ut}a xi ts'ín ni xi mjehe yjon-
 intee. ¹³ At'ah_a tsa ku_{intsu}b_{oo} xi nkúhu x_{ut}a xi

ts'ín ni xi mjehe yjonintee, kuayó. Tunga tsa Espirituhu Ntíaná n'ek'ienkohonu ni xi mjehe yjonintenuu, kuintsuba tík'un.

¹⁴ Ngayjee xi Espirituhu Ntíaná bakú niyáha, kui xi ntíhi Ntíaná. ¹⁵ At'aha Espiritu xi kin'ekjóhōon najmi kits'ín manuu xuta musuhu kjuabinkjuun. Kits'ín ma nínuu Ntíhi Ntíaná kō ts'ín nga: “Na'mi ichí”, k'úhín Ntíaná. ¹⁶ Kui Espirituhu Ntíaná nkuhú mako animaná nga tsuya kixi nga ñá xi ntíhi Ntíaná. ¹⁷ Tsa ñá xi ntíhi Ntíaná, ta sakúná ni xi ts'e. Jesucristo n'ekjáínkōōho ni xi ts'e Ntíaná. Tsa nd'ai títitjajíáán kjuanima xi j'ajin, ta sakúná kjuachánkaha.

B'i ts'ín tsakúya Pablo nk'ie nga tichuyáhaá nistjin nga Ntíaná ts'ín ma kikjinná ntíhi

¹⁸ B'a mana nga najmi chumi nihi kju'a'un xi tibená nistjin nd'ai tsa ch'achubakohoná kjuachánkaha Ntíaná xi kama chjiná askahan. ¹⁹ Ngayjee ni xi kits'ínnda Ntíaná tíncha kuyá kō 'yún mjehe nga s'ejña chji yá xutaha xi ntíhi Ntíaná. ²⁰ At'aha ni xi kamandoo najmi ta tjihin ra nga'yún xi kis'ehe nga tjuhun. Najmi kui kama mjehe nga b'a kamat'ain. Ntia níná b'a ts'ín y'énda nga b'a kamat'ain. Tunga ta tókuyahá ra ²¹ ni xi kamandoo nistjin nga najmi ta kuatsúhun. Tókuyáha nk'ie nga kama ndáihí ch'á xi y'anji, nistjin nk'ie nga b'a ts'ín kama ndáihí xi nkú tsjo ts'ín kama ndáihí ntíhi Ntíaná.

²² Yaá nga santaha nd'ai un tibehe ngayjee ni xi kits'ínnda Ntíaná, xi nkúhu nku tachjuún xi tsihin ntí. ²³ Kō najmi tu nku kui xi un tibehe. Ta un tibená kō ñá. At'aha ja tijnajinná Espirituhu Ntíaná.

Ja kik'ai títjunná ajihín ngayjee ni xi n'ekjáíhín askahan. Nkjún tibehe anímaná nga tíchuyáhaá nístjin nga ts'ín ma kikjinná Ntíaná ntíhi, nístjin nga n'ek'anki yjonintená.

²⁴ At'aha ja kin'ek'ankiná kō tíchuyáhaá ni xi sakúná, tūnga tsa ja kisuya ntsáá ni xi tíchuyáhaá, najmi tā tíchuyá saha ráá ni xu'bo. ¿At'aha yá xi kuyáha ni xi ja tijnáha? ²⁵ Tūnga tsa tíchuyáhaá ni xi najmi kjee yaá, tjihin nga chuyáhaá santa nkúhu nga n'ekjáíhín.

²⁶ Ta basinkoná Espirituhu Ntíaná, at'aha najmi ndjá tjiintuyáná. Najmi yaá ni xi kuíncháá, tūnga Espirituhu ní Ntíaná bankintjíná. Nk'ie nga nchjantjai un'unná Espiritu nginkun Ntíaná, najmi tjin én xi kuixínyahaná xi nkú tsu. ²⁷ Ntíaná xi be animáha xutá, kui xi be mí xi mjehe ts'ín Espiritu. At'aha xi nkú ts'ín mjehe Ntíaná, b'a ts'ín banki Espiritu nga nchjantjai xutá xi Ntíaná kikjats'e.

B'i ts'ín tsakúya Pablo xi nkú ts'ín tjoná Ntíaná

²⁸ Yaá nga ngayjee ni xi mat'ain xutá xi incha ts'intjo Ntíaná, Ntíaná ts'ínchjén niu ngandaha xutá xu'bo. Ntíanáhá j'ájihín xutá xu'bo at'aha b'a ts'ín kama mjehe. ²⁹ At'aha xutá xi kíkíe títjun Ntíaná, tā y'enda títjun nga b'a ts'ín s'eyaha xi nkúhu Ntíhi, tū xi kui Ntíu kamaha Ntí tjun ajihín já nts'e xi nkjin maha. ³⁰ Kō xi y'enda títjun Ntíaná, tā j'ájin. Kō xi j'ájin, tā kits'ín nga tsichu ma naxu nginkun. Kō xi kits'ín nga tsichu ma naxu nginkun, tā kitsjáha kjuachánka.

³¹ Kui b'a maha, ¿nkú kuixín sahaná? Tsa Ntíaná makoná, ¿yá xi ngjuai kontráná? ³² Kui xi ja y'éjña

nga tu nkú tsjáhá Ntíhi. Kits'ínkjas'en Ntíhi nga kin'ek'ien ngandaná. Kui nga tsa kitsjáná Ntíhi, ɛnkú ts'ín najmi ta tsjáhaná ngayjee ni xi tjín?

³³ ɛYá xi kamahá ts'íínk'anji jé xuta xi Ntíaná j'ájin? Ntíaná kits'ín nga naxu xuta xi ts'e. ³⁴ ɛYá xi b'a kuítsu nga ngatitsun y'a? Cristo Jesu k'ien ko j'áiya ngáha ra ngabayoo ko tijnat'aha Ntíaná nd'ai nga tĩbankintjainá. ³⁵ Tjoho ná Cristo. ɛYá xi kamahá kjé'aná kjuatjoho? ɛA kjuanima? ɛA kjuaboo? ɛA kjua'unchoo? ɛA kjintio? ɛA tu ngat'aha nga x'aán? ɛA ni ch'onk'un xi mat'aán? ɛA ra ngahá n'ek'ienná? ³⁶ B'a ma xi nkú ts'ín tjit'a éhen Ntíaná:

Ngat'a ts'i tehente tintsubajiin ngabayoo.

Xi nkúhu chutsanka xi n'ek'ien, b'a ts'ín baseni jóo.

³⁷ Tunga ajihin ngatentee ni xu'bi xi kits'íntjoná ta ts'ín nga tu sahá 'yún n'e ngana saá. ³⁸ At'aha behe k'an nga najmi tjín xi kamahá kjé'aná kjuatjoho Ntíaná, ndaha tsa kuayáá ko ndaha tsa kuĩntsuba tik'aán, ta ndaha ntĩtsjee ko xi batéxuma ko xi tjihin nga'yún, ta ndaha ni xi tíma nd'ai ko xi kama askahan, ³⁹ ta ndaha ni xi nk'a ko xi nanka, ta ndaha nku ni xi kits'ínnda Ntíaná. Najmi tjín xi kamahá kjé'aná kjuatjoho Ntíaná, kjuatjo xi tsakúchjiná nga kitsjáná Nda Ntíaná Cristo Jesu.

9

B'i ts'ín tsakúya Pablo xi nkú ts'ín Ntíaná j'ájin xuta xi ntje judio tjehe ra

¹ Cristo be nga kjuaxi ni xi tíxian. Najmi tĩb'anachá. Ko Espiritu Santo b'a tĩtsuna nga b'a tjín ni xi tĩts'ínkjihin k'an. ² Tjín babana ko ixí tĩneyahá

tíma an_ima_{na}. ³ Tsa kama kai, mjena tsa santaha an kama nku xi najmi nda nginkun Nt_ianá k_o tsa kjin kúátejñaha Jesucristo, tsa t_u ahá ni b'a ts'ín kama kúásinka já nts'é, kui xi ntjena. ⁴ Xi ntje Israel tjehe_n ra. Nt_ianá kits'ín ma ntíhi. Y'ejñajihin k_o tsakúchijihi kjuachánkaha. Ni y'éndak_o ntje cháha k_o kitsjáha kjuatéxumaha. Tsakúchijihi xi nkú ts'ín tji_{hi}n nga ts'íintsjoh_o k_o kitsúya títjuh_un ni xi tsjáha. ⁵ Nkuhú ntje chá xi j'ájin Nt_ianá, y_o nibaha ra xuta Israel k_o ajihin xuto tsitjujin xi kits'ín niba Nt_ianá nk'ie nga kik'a yjoninte xi nkúhu xuta. Kui xi Nt_ia xi batéxumaha ngayjee ni xi tjín. Kan'etsjo tehentehe t_u nkjéhe ni. B'a katuma.

⁶ Tunga najmi j'a tiyaha éhen Nt_ianá. At'aha najmi ngatentee xuta xi y'aha ra ntjehe Israel, tsa kui xi xuta Israel kikjin. ⁷ K_o najmi ngatentee xi y'aha ra ntjehe Abraham, tsa kui xi ntí kikjihin Abraham. At'aha Nt_ianá b'a kitsúhu Abraham: “Ntje xi s'ehi Isaac nibaha ra.” ⁸ Kui xi tsuhu ra nga najmi ntí xi kis'ehe Abraham xi nkú ts'ín s'ená ntí, tsa kui xi ntíhi Nt_ianá. Ntí xi kis'e níhi xi nkú ts'ín kitsúya títjun Nt_ianá, kui xi kits'ínchijihi nga kui xi ntjehe Abraham. ⁹ At'aha kui én xu'b_i xi kitsúya títjuh_un Nt_ianá Abraham: “Núni xi nkú ma nistjin xu'b_i kuakuchijihi nga'yúnna. Nku ntíx'in s'ejñaha Sara.”

¹⁰ K_o najmi t_u nku ni xu'b_i kama. B'a ta kamat'ain Rebeca nk'ie nga y'a ntí'y_un. Kui xi kama chjuúhun Isaac xi t_a ntje cháha xuta Israel. ¹¹ Nt_ianá kinchjako títjuh_un Rebeca nga kinchjanijmíyaha ntíhi nk'ie nga najmi kjee tsin k_o najmi kjee ts'ín ni xi nda k_o a ra ni xi ch'onk'un, t_u xi kuitjusuhun ni xi y'enda títjun Nt_ianá nga j'ájin

ntí xi kama mjehe. At'ahā Ntīanā f'ájin xutā xi mjehe, najmi f'ájin tū ngat'ahā ni nda xi ts'ín xutā. ¹² Kui nga b'a kitsúhu rá Rebeca: “Ntí xi tjun tsíun, musúhu ntí xi tsjénkiu kama.” ¹³ Xi nkú ts'ín tjit'a éhen Ntīanā nga b'i títu: “Tjo kits'ian Jacob kō kits'in unkie Esau.”

¹⁴ Kui b'a maha, ¿nkú kuixíhinná? ¿A ts'ín Ntīanā ni xi najmi naxu tjin? ¡Najmi! ¡Ndaha tsa mí yjehe! ¹⁵ At'ahā b'a kitsúhu Moise: “Kama nīmana xi mjena nga kama nīmana, kō kuase nīmahā xi mjena nga kuase nīmahā.” ¹⁶ Kui b'a maha, najmi ngat'ahā tsa ni xi mjená kō tsa ni nda xi t'n'eé, tsa kui kjuāha nga nda ts'ínkohoná Ntīanā. Nda ní ts'ínkoná at'ahā ma nīmahā ñá. ¹⁷ At'ahā b'i ts'ín tjit'a má nga b'a kitsú Ntīanā nga kinchjako nda faraon: “Kitsja xāha tū xi kuakuchjīhina nga'yūnna kō tū xi chāhana nga ngúsuhun asunntee.” ¹⁸ Kui b'a maha, Ntīanā ma nīmahā rá xi mjehe nga kama nīmahā kō ts'ín ndjá anīmahā xi mjehe nga ts'ín ndjá anīmahā.

B'i ts'ín tsakúya Pablo xi nkú ts'ín Ntīanā bakúchji kjuakjahan kō kjuatsentaha

¹⁹ Kutsa b'ahá kuixínni: “¿Mí nihi xi ts'ínnijéhená Ntīanā yō nī ma? At'ahā, ¿yá xi ma fi kontrahā ni xi mjehe Ntīanā?”

²⁰ ¿Yáhá ni ji nda, tsa kuinchíhi kuenta Ntīanā? Nku ndjii najmi ma: “¿Á b'a n'e kin'endahaní?”, tsa kuitsúhu xi kits'índahā. ²¹ ¿A najmi tjiín rá kixi nda xi ts'ínni ndjii nga ts'íinko nintee xi nkú ts'ín mjehe? Tā kuihi nintee kama ts'ííndako nku ndjii xi sasíña tsjo kō nku xi n'echjén tehente.

22 Nt̃iáná mjehe nga kuakúchji kjuakjahan ko nga k'uéjña chji nga'yúhun. Tunga títs'in chúkjuaha ko títs'intsentako xuta xi nibajennehe kjuakjahan, kui xi xá n'ekjehe. 23 B'a títs'in Nt̃iáná tu xi chaha ra xi nkú ts'in chánka kjuachánka xi tjínkoho xuta xi tíma nimaha, xuta xi ja y'énda títtjun nga tsjáha kjuachánkaha.

24 Ná xuta xu'bo. Nt̃iáná j'ájinná najmi tu nku ajih̃in xuta xi ntje judio tjeheñ ra, tu sa ní ko ta ajih̃in xi najmi ntje judio tjeheñ ra. 25 B'a kama xi nkú ts'in y'ét'a éhen Nt̃iáná nda profeta Osea nga b'i títsu:

Xuta xi najmi xutana, kui xi ts'in ma xutana.

Ko xi najmi kits'intjá, kui xi ts'intjá.

26 Ko xi má nga b'a kik'ih̃in xuta:

“Jun xi najmi xutana mahanu”,

b'a k'úin nga kui xi ntíhi Nt̃iáná xi tíjña tík'uun.

27 Ko b'a ta kitsú nda profeta Isaia nga kinchjanijmíyaha xuta Israel: “Ndaha tsa b'a ts'in nkjin maha xuta Israel xi nkú joyaha tsumí xi tjíndai ntáchak'uun, tunga tu chubahá xi n'ek'anki.

28 At'aha ja ts'íintjusun xatí Nt̃iáná ni xi kitsú nga kama nga ngúsuhun asunntee.” 29 Xi nkú nga ta kitsú títtjun Isaia nk'ie nga b'i kitsú:

Tsa najmi y'éjña saná ntje Nt̃iáná xi tjíh̃in nga'yún, ja ra b'a ta kamat'aán tsakai xi nkúhu xuta Sodoma ko tsichu ma raá tsakai xi nkúhu xuta Gomorra.

B'i ts'in tsakúya Pablo yá xi naxu bichú ma nginkun Nt̃iáná

30 Kui b'a maha, ¿nkú kuixíhinná? Xuta xi najmi ntje judio tjeheñ ra, xi najmi tsangisjai nga naxu k'úentu nginkun Nt̃iáná, kui xi naxu tsichu

ma nginkun Ntíaná. Kis'ejiñin Ntíaná, kui nga naxu tsichu maha. ³¹ Tunga máha xuta xi ntje judio tjeñen ra, incha tsangisjái nga ts'íintjusun kjuatéxuma xi kin'ekjas'eñen Moise, tu xi b'a ts'ín naxu k'úéntuhu nginkun Ntíaná, tunga najmi tsichukjuahá ra.

³² ¿Á b'a kamaha? At'aha najmi tsangisjái nga naxu k'úentu nginkun Ntíaná xi nkúhu xuta xi s'ejiñin Ntíaná. Tu sa ní incha kama mjehe nga ts'íintjusun ni xi tjít'a kjuatéxumoó tu xi b'a ts'ín naxu kuichú maha kai. Incha kisaténki ndjio xi saténki xuta. ³³ B'a kama xi nkú ts'ín tjít'a:

An k'uejñá nanki Sion nku ndjio xi saténki xuta,
nku naxi xi ts'íinxuntuhu.

Tunga xi s'ejiñin xi ts'ín nibá,

kui xi najmi sakúhu kjuasuba.

10

¹ Jun já nts'e, nk'ie nga nchjaka Ntíaná, bankintjá xuta Israel, at'aha mjena nga n'ek'anki. ² At'aha kama xinya nga kui xi 'yún tíncha bangisjai ni xi ts'e Ntíaná, tunga najmi incha mankjihín ra xi nkú ts'ín tjihin nga incha ts'íín. ³ Najmi kamankjihín nga Ntíaná tu tsjáhá ra xuta xi s'ejiñin nga naxu kama. Tu sa ní kuenta ts'e suba incha tsangisjai xi nkú ts'ín naxu kuichú ma nginkun Ntíaná. Najmi kits'ín nimakjua yjoho tsa ts'íínkjáíñin nga Ntíaná tu tsjáhá ra xuta nga naxu kama nginkun. ⁴ At'aha tsichutjusun kjuatéxuma xi kin'ekjas'eñen Moise nk'ie nga j'ai Cristo, tu xi naxu kuichú maha nginkun Ntíaná ngayjee xi s'ejiñin.

B'i ts'ín tsakúya Pablo nk'ie nga ngayjee xuta xi s'ejihin Ntíaná naxu bichú ma nginkun Ntíaná

⁵ B'i ts'ín y'ét'a Moise xi nkú ts'ín naxu bichú maha xuta xi ts'íntjusun kjuatéxuma xi kin'ekjas'ehen Moise. B'i kitsú: “Xi ts'íntjusun ni xi tjít'a kjuatéxumoo, ngat'aha kjuatéxumoo sakúhu ra nga k'uéjña tík'un.” ⁶ Tunga b'ihí ts'ín y'ét'a ngá xi nkú ts'ín naxu bichú maha xuta xi s'ejihin Ntíaná: “Najmi tu b'i ts'ín n'enkjíntak'uin: ¿Yá xi ngjuainji ndjiojmi ján?” Tsuhu ra éin tsa n'e nibájen xi ts'íin niba Ntíaná ngajoho. ⁷ Kó b'i ta kitsú ya: “Kó najmi tu b'i ts'ín n'enkjíntak'uin: ¿Yá xi ngjuai kinte t'anankiu?” Tsuhu ra éin tsa chjúsíntjen xi ts'íin niba Ntíaná ngajoho ajihin xuta k'ien. ⁸ B'i kitsú Moise: “Tijñat'a tiñahi éhen Ntíaná, tsu'bai kó animahí tijñat'a.” Kui éin xi tíb'enijmú nd'aj, én xi tsu nga xuta tjíhin nga s'ejihin Ntíaná.

⁹ At'aha tsa tsu'bai kuitjuhu nga n'ekiei yjohi nga Jesu xi Nda Ntíaná, kó tsa ngayjehe animahí s'ejihin nga Ntíaná kits'ínkj'áya ngáha ra Jesu ngabayoo, n'ek'ankihi. ¹⁰ At'aha ajin animaha ní xuta nibáha ra nga s'ejihin Ntíaná, tu xi naxu bichú maha. Kó ts'a bitjuhu nga b'a tsu nga Jesu xi Nda Ntíaná, tu xi n'ek'ankihi.

¹¹ B'i ts'ín tjít'a éhen Ntíaná: “Xi s'ejihin Ntíaná najmi sakúhu kjuasuba.” ¹² At'aha nkuhú chasehe ra xuta xi ntje judio tjeheh ra kó xi najmi ntje judio tjeheh ra. At'aha nkuhú maha Nda Ntíaha ngayjee xuta kó tsjáha ngayjee xi kuinchjakoho kjuanchiná xi tjíhin. ¹³ At'aha b'i ts'ín tjít'a: “N'ek'anki ngayjee xi ts'íínkjáihin nga kui xi Nda Ntíaná.”

¹⁴ Tunga xuta xi najmi kjee s'ejihin, ¿nkú ts'in ts'ínkjáihin ra nga kui xi Nda Ntíaná? ¿Nkú ts'in s'ejihin ra xi najmi kjee nt'é yáha kui? ¿Nkú ts'in kuint'éhe tsa najmi tjín xi k'uénijmíhi? ¹⁵ ¿Nkú ts'in k'uénijmíhi xuta tsa najmi s'et'a xáha nga k'uénijmí? At'aha b'i ts'in tjít'a: “Á b'a tsjo tjíhin nga f'aik'úhunná xi b'énijmíná én nda tsu.”

¹⁶ Tunga najmi ngayjeehé xuta Israel kits'ínsihin én nda tsuhu Ntíaná. B'i kitsú Isaia: “Ji Ntia, ¿yá xi kis'ejihin én xi y'enijmí?” ¹⁷ Kui b'a maha, s'ejinná Ntíaná nk'ie nga nu'yáá éhen, kó nu'yáá éen nk'ie nga s'enijmíná Jesucristo. ¹⁸ Tunga b'ahá xian: ¿A najmi kinu'yáhá éen? Johon, kinu'yá. At'aha b'i ts'in tjít'a:

Nga ngúsuyun asunntee kinu'yá ntaha,
santaha má fekuhu asunntee tsichu éhen.

¹⁹ Kó b'i ta xin ya: ¿A najmi incha kiekiehé xuta Israel ni xu'bi? Tjun Moise b'i ts'in y'ét'a éhen Ntíaná:

An ts'ian nga jun kama xintak'un
xi tu a xutahá,
kó ts'ian nga n'ekjankoo
xi najmi chumi nihi xi mankjihin.

²⁰ Kó askahan kama k'un Isaia nga b'i ta ts'in y'ét'a éhen Ntíaná:

Xi najmi tsangisjaina, kui xi kisakúhu an,
kó xi najmi kingjásjaiyana, kui xi tsakuchjhi yjona.

²¹ Ngat'a ts'e xuta Israel b'i ts'in tjít'a: “Nku nistjin ntanta kik'ana nga kingjentéhe ntsa nku naxinantá xi najmi nt'é'én kó si.”

11

B'i ts'ín tsakúya Pablo nk'ie nga ta tjín ajihin xuta xi ntje judio tjeheñ ra xi ja ts'anki

¹ Kui nga b'a xihinna, ¿a kits'ín t'axíhín Ntíaná xutaha? ¡Najmi! ¡Ndaha tsa mí yjehe! At'aha ta nda Israel ná, ntjehe Abraham. Ntje cháná Benjamin y'ahana. ² Najmi y'éjña t'axín Ntíaná xuta xi ts'e xi j'ájin tíjün. ¿A najmi yanú xi nkú ts'ín tjít'a xujun éhen Ntíaná má nga nda profeta Elia kinchjako Ntíaná ko tsatéjéne xuta Israel? B'i ts'ín tjít'a: ³ “Ji Ntia, ja kits'ínk'ien xuta xu'bi já profeta xi ts'i ko ja kits'ínkatsún nachan chjeji. Tu nkuhú an tíjña sa. Ta incha mjehe ta ts'ínk'ienna.” ⁴ Tunga b'ahá kitsú Ntíaná: “Ja kits'in ts'an yatu mii já xi najmi tsasinkúñch'int'aha ntia Baal.”

⁵ B'a ta tíma nistjin nd'ai. Tu ngat'aha kjuandaha Ntíaná tjintu sa chuba xuta xi Ntíaná j'ájin. ⁶ Tsa tu ngat'aha kjuandaha Ntíaná kichj'ajihin xutai, tsuhu ra nga najmi kichj'ajin tu ngat'aha ni nda xi incha kits'ín. At'aha tsa tu ngat'aha ni nda xi incha kits'ín xuta kichj'ajihin, kjuandaha Ntíaná najmi ta chjiji ra ma.

⁷ Kui b'a maha, ¿mí nihi xi kama? Najmi kisakúhu ni xi tsangisjái xuta Israel. Xi j'ájin ní Ntíaná, kui ní xi kisakúhu niu. Xingisoo kama ndjá animaha. ⁸ B'a kama xi nkú ts'ín tjít'a: “Ntíaná kitsjáha xuta xu'bo kjuankjintak'un tiya, tunkun xi najmi skuëkoho ko tjabaxínñju xi najmi kuint'ékoho santaha nistjin nd'ai.”

⁹ Ko b'i ta kitsú ya David:
Kasaténkiko s'íhi xuta xu'bo,
ta kuihi kats'ínndyjajihin ko kats'ínk'íéchjiji.

¹⁰ Incha katuma ka tu xi najmi ta skuehe,
ko musu incha katuma sín.

*B'i ts'ín tsakúya Pablo nk'ie nga ta n'ek'anki xuta
xi najmi ntje judío tjeheñ ra*

¹¹ Kui nga b'a xihinna, ¿a tu niyá kis'entuhú
xuta Israel nk'ie nga kisaténki? ¡Najmi! ¡Ndaha tsa
mí yehe! B'i ní kama. Tu ngat'aha nga najmi
kint'é'éhen Ntíaná xuta Israel, kui nga j'aihi ra én
xi ts'ínk'ankihi xuta xi najmi ntje Israel tjeheñ ra,
tu xi b'a ts'ín kama xintak'uhun xuta Israel. ¹² Tsa
tu ngat'aha nga najmi kint'é'éhen Ntíaná xuta Is-
rael, tsa kui ngat'oo kisakúhu ra kjuanchináha
Ntíaná xuta xi tjin asuntee, ko nk'ie nga kisaténki
Israel kisakúhu kjuanchináha Ntíaná xuta xi najmi
ntje Israel tjeheñ ra, ¿nkú sa kama nk'ie nga sakú
ngáha ra xuta Israel ante xi ts'e nginkun Ntíaná?

¹³ Tínchjakonuu jun xi najmi ntje Israel
tjeheñuu. Ntíaná kits'ín mana nda postruhu
xuta xi najmi ntje Israel tjeheñ ra ko xinya
kjuachánkahá xána. ¹⁴ B'a ts'ian tsa tu ahá ni
ngat'anuu kama xintak'uhun ntjena, tsa tu xi b'a
ts'ín n'ek'ankihi k'ua. ¹⁵ At'aha kisakúhu kjuajyu
nginkun Ntíaná xuta xi tjin asuntee nk'ie nga
kin'e t'axín xuta Israel. Kui nga, ¿nkú sa kama
nk'ie nga n'ekjáiñ ngáha ra? Sakú ngáha ra nga
k'úentu tik'un xuta k'ien.

¹⁶ Tsa tsje nginkun Ntíaná na'yu xi n'endakoho
ninkuan chje xi 'bai tjuhun Ntíaná, tsuhu ra nga
ta tsje ngayjee na'yu ninkuon. Tsa tsje nginkun
Ntíaná kjamaha nku yá, tsuhu ra nga ta tsje tjiaha.
¹⁷ Xuta Israel, kui xi nkú joyaha tjia xi kitit'áha
nku yá olibo, ko ji xi nkú joyaha tjiaha yá olibo

jñá. Tunga jihí kis'et'ai antehe tjia xi kitit'óo kō kisakút'aihi kjuatík'un xi tijnajin kjamaha yá olibo xi ndoo. ¹⁸ Tunga najmi tu nk'ahá n'esjei yjohi, tsa b'a kuixín nga ji xi 'yún nda sai nga tjia xi kitit'óo. Tsa mjehi nk'a n'esjei yjohi, tu sahá n'ekj'áitsjein nga kjamaha yóo y'aha ri. Najmi ji xi kich'ai kjamō.

¹⁹ Kutsa b'ahá kuixín: “Tu xi an s'et'ahana antehe yóo, kui nga kitit'áha.” ²⁰ B'a tjin. Tunga kitit'áha at'aha najmi kis'ejihiñ Ntjaná, kō ji ndjá tisinjñai nd'ai at'aha s'ejihiñ. Kui nga najmi tu n'enkjíntak'uhunni tsa ji xi 'yún nda sai. Tu sa ní tñkjúñ Ntjaná. ²¹ At'aha tsa Ntjaná najmi kits'ínndyjat'aha tjia xi ndaha yá olibo, ¿a tu kjehé ji ts'ínndyjat'ahi nga tu kisut'aní yóo?

²² Chasei xi nkú ts'ín nda kō ndjá ts'ínkō Ntjaná xuta. Ndjá kits'ínkō xi kisaténki kō ji nda kits'ínkōhi. Kō nda ts'ínkōhi tsa tu nku kuinchunjiní kjuandaha. Tunga tsa najmi b'a n'eí, kō ta ji kuichát'ahi. ²³ Kō ta xuta Israel, tsa ngjuaikj'áha ra animaha kō s'ejihiñ Ntjaná, k'uai ngáha ra ante xi ts'e. At'aha tjihiñ nga'yún Ntjaná nga tsjá ngáha ra ante xi ts'e xuta Israel ajihñ yá olibo. ²⁴ At'aha ji xi nkú joyaha tjiaha yá olibo jñá tu kis'et'aní antehe yá olibo xi ndoo. Kui b'a maha, ¿a najmi kamahá k'uai ngáha ra xuta Israel antehe? At'aha kui xi tjia xi ndoo.

B'i ts'ín tsakúya Pablo nk'ie nga kama nimaḥa Ntjaná ngayjee xuta

²⁵ Jun já nts'e, mjena nga chōo nku ni xi y'éjña 'ma Ntjaná, tu xi najmi nk'a n'esjehenu yjonuu. K'ua xi tjin ajihñ xuta Israel kama ndjá animaha.

B'a kama santa nkúhu nga sakúntehe nginkun Ntíaná ngayjee xutá xi najmi ntje Israel tjeheñ ra. Kui xi tjíhin nga n'ek'anki. ²⁶ Nk'ie nga ja b'a kama, tá n'ek'anki ngayjee xutá Israel. Xi nkú ts'ín tjit'a éhen Ntíaná:

Nanki Sion nibaha xi ts'ínk'anki xutana, kui xi kjéxihin kjuach'onk'uhun ntjehe Jacob.

²⁷ Kui nij xi y'endáká xutana nga ts'ian, nk'ie nga ja kjexián ngatitsuhun.

²⁸ Najmi mjehe xutá Israel én nda tsuhu Ntíaná. Ngandanuu xutá kontrahá Ntíaná tsichu ma. Tunga tjohó ra Ntíaná xutá Israel tú ngat'ahá nga Ntíaná j'ájin ntje cháha. ²⁹ At'ahá najmi kje'á Ntíaná ni xi tsjá kó tá ndaha najmi ts'ín t'axín xutá xi j'ájin.

³⁰ Nistjin nk'ie, najmi kinu'yá'óhoon Ntíaná, tunga tibase nímahánuu nd'ai tú ngat'ahá nga najmi kint'é'én xutá Israel. ³¹ Kó santaha nistjin nd'ai najmi tint'é'én xutá Israel, tú xi tá chase nímahá rá tú ngat'ahá nga jun kichase nímánuu. ³² B'i tjíhin rá nij. Ndaha nku xutá xi tjín najmi nt'é'éhen Ntíaná. Ntíaná y'éjñahá xutá nga najmi kint'é'én, tú xi nkuhú nga kama nímahá rá ngayjee.

B'i ts'ín kits'intsjohó Pablo Ntíaná

³³ ¡Á b'a nkjún ts'ín chánkaha kjuanchináha Ntíaná! ¡Á b'a nkjún ts'ín nanká ts'ínkjin'uhun kó á b'a nkjún ts'ín tsehe kjuankjintak'uhun! Najmi tjín xi mankjihin ni xi ts'ín Ntíaná kó najmi ch'a mahá tsuya á b'a ts'ín.

³⁴ At'ahá, ¿yá xi be xi nkú ts'ín ts'ínkjin'un Ntíaná? ¿Yá xi kitsúyahá ni xi tjíhin nga ts'ín?

³⁵ ¿Yá xi kits'ínkienyahá tsa mí nihi,

tú xī Nt̃iáná t̃j̃hīn nga ts'íink'óya ngáha ra?

³⁶ At'aha Nt̃iáná kits'ínnda ngayjee ní xī t̃j̃ín. Ngat'aha kō nga tsjohō t̃j̃hīn niu. ¡N'ekié yjoná nga t̃j̃hīn kjuachánka Nt̃iáná tú nkjéhé ní! B'a katuma.

12

*B'í ts'ín tsakúya Pablo xī nkú ts'ín tintsubaá nd'ai
nga ja yjankiá Cristo*

¹ Kui b'a maha, já nts'e, at'aha t̃íbase ñimaná Nt̃iáná, kui nga t̃íbankih̃inu nga ngayjehe tak'un n'etsjohō Nt̃iáná, nga n'ekjas'ohōon yjonuu xī nkú joyaha nku chje t̃ík'un xī tsje kō xī sasih̃in Nt̃iáná. ² Najmi tú bintsuhōo xī nkú ts'ín t̃j̃íntu xut̃a asuntee. Tú sa ní n'ek'óntjaiyo yjonuu xī nkú ts'ín Nt̃iáná t̃íts'ín t̃setse kjuankjintak'unñuu, tú xī b'a ts'ín k̃amankj̃ih̃inñuu ní xī mjehe Nt̃iáná, ní xī nda, xī sasih̃in kō xī ja nda tsichu ma.

³ Nga nkúnkú jun t̃ínchjakonuu, at'aha Nt̃iáná kitsjána kjuandaha. Najmi tú nk'a n'esjo yjonuu. Nkú ní ts'ín t̃j̃íyanuu. B'a ts'ín n'esjo yjonuu xī nkú ts'ín kitsjáñuu Nt̃iáná nga s'ejinñuu. ⁴ At'aha xī nkú ts'ín nkj̃in t̃íkja maha ní xī y'aha yjonintená kō xī nkú ts'ín kj'aí kj'aí xá xī kik'ah̃i nga nkúnkú, ⁵ b'a t̃a joyaha ñá. Nkj̃in mahaná t̃unga nkuhú yjoninte kamakáa Cristo. Nga nkúnkáá kich'aá xinkjá.

⁶ Kj'aí kj'aí ní xī maná n'eé. Kui kjuanda xī kitsjána Nt̃iáná nga nkúnkáá. Xī Nt̃iáná kitsjáha éhen tú xī ts'íinkjas'ehen, kui xī katsúya éhen Nt̃iáná xī nkú ts'ín kik'aih̃i nga s'ejih̃in. ⁷ Xī kik'aih̃i nga kuasinko xut̃a, kui xī katasinko xut̃a. Xī kik'aih̃i nga kuakúya, kui xī katakúya. ⁸ Xī kik'aih̃i nga tsjá nga'yún, kui xī katsjá nga'yún. Xī kik'aih̃i nga

tsjá toon, kui xi ngayjehe animaha katsjá toon. Xi kik'áihí nga tsjén tíjún, kui xi kixí katjiko xáha. Xi kik'áihí nga kuase nimaha xuta, kui xi tsjo kat'ehe nga b'a kats'ín.

B'í ts'ín tsakúya Pablo nk'ie nga kjuatjo tíñajinná

⁹ N'etjō kjuaxi xinkiu. Najmi tu n'esiuhun ni xi ch'onk'un. Ni xi nda ch'a ntsja ntsjon. ¹⁰ B'í ngján n'etjō xinkiu xi nkú ts'ín tjohō xinkjín xi nts'e maha, at'aha nts'ohó mahanuu xinkiu. 'Yún chan kjún so xinkiu. ¹¹ Kixi n'oo ni xi tín'o kō najmi tu n'ets'o. Tu xí tsjohó kat'ehe animanuu nga n'oo ni xi mjehe Nda Ntjaná. ¹² Tsjo kat'enuu nga chúyohō ni xi tsjánuu Ntjaná. N'echúkjuo kju'a'un xi tíyo. Najmi tu n'ekj'ajiun nga chubakoo Ntjaná. ¹³ Tjohoon ni xi ndyjat'áha xuta xi yjanki Ntjaná kō nda n'ekjóhōon xi kuichúk'unnuu.

¹⁴ Chubantjo xuta xi tjennki unkienuu. B'a t'ihuun Ntjaná nga nda kats'ínkōhō. Najmi tu ni xi najmi nda binchinó nga kamat'ain. ¹⁵ Tsjo kat'ekonuu xi tsjo tjíhín. Ch'ííko xi tíkjintá. ¹⁶ B'í ngján nda chasohō xinkiu. Najmi tu nk'a katu-manuu yjonuu. Tu sa ní nda chasohō xuta x'an. Najmi tu xuta nkjink'un n'e ma suboo yjonuu.

¹⁷ Najmi tu ch'on n'ohō xi ch'on títs'ínnuu. Chase nínú xi nkú ts'ín nda kama n'ohō ngayjee xuta. ¹⁸ Tsa kama, tsa aya ntsoo tíña, kas'ekonuu kjuajyu ngayjee xuta. ¹⁹ Já nts'ena, najmi tu n'e ngajoyo ni xi tín'enuu. Aya ntsja ní Ntjaná t'ejñayo xi b'a títs'íun. At'aha b'í ts'ín tjít'a éhen Ntjaná: "Ahán xi k'uasjé chjía, an xi tsjaha chjíhi. B'a títsu Ntjaná." ²⁰ B'í ta ts'ín tjít'a ya: "Tsa tíma bjohō nda kontrahi, tjeihín ni xi kjine. Tsa tíma xintáha,

tjeihin ntá xi k'úi. At'ahá tsa b'a n'eí, tū ni xí kama subahá rā nda kontrahi.” ²¹ Najmí tū 'bainteí tsa kjuach'onk'uun xi ts'íin nganahi. Tū sa ní ni xi nda n'eí. B'a ts'ín n'e nganaha rí ni ch'onk'uun.

13

B'i ts'ín tsakúya Pablo nk'ie nga tjihin nga chankjún xi batéxuma

¹ Ngayjee xutá tjihin nga kuint'é'éhen xi batéxuma. At'ahá xá xi tjihin xi batéxuma nginkun Ntíaná nibáha rā. Ntíaná y'éjña xóo. ² Kui nga xi fi kontraha rā xi batéxuma, kui xi tífi kontraha ni xi ja y'éjña Ntíaná. Kó xi b'a tít'sín, tá kuihi t'bangisjai suba nga n'ekokjuaha.

³ At'ahá já xi batéxumoo najmí tjintu tsa tū xi ndjá ts'ínkoho xutá xi nda ni xi tít'sín. Xutá xi najmí nda ni xi tít'sín, kui xi b'a kats'ihin. ¿A mjehi nga najmí ndjá ts'ínkoho já xi batéxumoo? Tsa b'a, nda n'eí, kó nda ts'ín kuasehi já xi batéxumoo. ⁴ At'ahá ngandahi ní tít'sínxát'ahá rā jóo Ntíaná. Tunga tsa ni xi najmí nda tín'ei, tjihin nga kuint'jún tū ngat'ahá ni xi ts'ínkoho jóo. At'ahá najmí tū a tjihin xá jóo. Ntía níná tít'sínxát'ahá tū xi ts'ínk'íechjíhi kó ts'ínkokjuaha xi ch'on tít'sín. ⁵ Kui nga tjihin nga kuint'yá'éhen ráá já xi batéxumoo, najmí tū ngat'ahá ni tsa ts'ínk'íechjíná ni xi n'eé. B'a ní n'eé tū xi je s'eyaha kjuankjintak'unná nginkun Ntíaná.

⁶ Kui kjuaha nga b'echjíninu ni xi f'áchjínnyu já xi tjihin xá, at'ahá kui xi tijncha ts'ínxát'ahá Ntíaná. Xáha tijncha ts'ín. ⁷ Tjohoon ni xi kanéhe nga nkúnkú jóo. T'echjínnyu xi f'áchjintjai ni xi tjinnnyu

kə xi f'áchjintjai ch'á nga ts'ínxát'ahə já Rómə. Chənkjún xi nkú ts'ín tjíhin nga chənkjún, kə nda n'esiuhun xi nkú ts'ín tjíhin nga nda n'esihiin.

B'i ts'ín tsakúya Pablo mí kjuəha nga n'etjóná xinkjá

⁸ Najmi tū chumi nihi xi katsjennu. Tjohoon kjuatjo xinkju. At'ahə xi tjohə xinkjín, kui xi tít's'íntjusun ngayjee kjuatəxumə Ntjáná. ⁹ B'i ts'ín tjít'a kjuatəxumo: “Najmi tū ch'at'aihi chjühin. Najmi tū n'ek'iein animə. Najmi tū n'ei ndyjé. Najmi tū fasihiin ni xi tjíhin xutə.” Kui kjuatəxumo kə ngayjee kjuatəxuma xingisoə nkuhú bichú majihin kjuatəxuma xu'bi: “N'etjóí xutahi xi nkú ts'ín tjohi yjohi.” ¹⁰ Xi tjohə xinkjín, kui xi najmi ch'on tít's'íhiin. Kui nga bichújtusuhun kjuatəxumo əjihin xutə xi tjíhin rə kjuatjo.

¹¹ B'a n'oo at'ahə yo nistjin xi kich'aá nd'ai. Ja chubəhə nga n'ekj'áhaá yjoná nga kuintsubə ndaá. Ja 'yún chubə ndyjahə nd'ai nk'ie nga Ntjáná ts'íink'ankiná. Najmi b'a tə tjín ndyjahə rə xi nkúhu nk'ie nga kis'ejinná. ¹² Ja ma kuichúhú chubə. Najmi tə n'ehená ngatitsun, atahə nk'ie nga ngatitsun n'eé, b'a joyahə xi nkúhu tsa má jyuun tintsubaá. Ni xi nda n'eé. Kui xi b'a tə joyahə xi nkúhu tsa má ndzjen tintsubaá. K'úendaá yjoná tū xi kuinimajihiná má ndzjen.

¹³ Kixi tankínkaá yjoná xi nkúhu xutə xi tjíma nga nistjiun. Najmi kuintsubaá tsa tū xi s'ihiná kə chineé. Najmi tjíhin nga chubə súntukonáá xinkjá kə tsa n'ejnu n'et'aá. Kə tə ndaha najmi tū bixkjankáá xinkjá kə tsa kəma xin k'aán ni xi tjíhin. ¹⁴ Tū sa ní tínúngijiun yjonu Nda Ntjáná

Jesucristo kō najmi tū n'enkjíntak'un xi nkú ts'ín n'ehenu ni xī mjehe yjoninte ngatitsuun.

14

B'i ts'ín tsakúya Pablo nk'ie nga najmi tjihin nga n'ek'anjiá jé xinkia

¹ Nda n'ekjóhōon xi najmi ndjá sijnajin xi nkú ts'ín s'ejinná, kō najmi tū b'esikōo ngat'aha xi nkú ts'ín ts'innkjink'un. ² Tjín xi b'a ts'ín s'ejihin nga ma kjine tū mí nichinehé ni, kō tjín ngá xi najmi ndjá sijnajin xi nkú ts'ín s'ejinná kui nga tū xkahá kjinehe. ³ Xi kjine tū mí nichinehé ni najmi tjihin nga ch'on ts'ín kuasehe xi b'éch'ohō yjohō ni xi kjine. Kō xi b'éch'ohō yjohō ni xi kjine najmi tjihin nga ts'íink'anji jé xi kjine tū mí nichinehé ni. B'i incha kats'ín at'aha Ntíaná ja kits'ínkjáihin nga joo. ⁴ Yáha ji xi t'n'ek'anjihinni jé nda musuhū xi kj'ái? Tsa ndjá sijná nda musu kō tsa tísaténki, Nda Ntíahā kjinehe ni xu'bo. Tunga ndjáhá kuasijná, at'aha tjihin nga'yún Nda Ntíaná nga ndjá ts'íinkasijná.

⁵ Tjín xi b'a maha nga 'yún nkjún sa nku nistjin nga kj'ái nistjin, kō tjín ngá xi tū nku chubā maha nistjiun. Nkúnkú tjihin nga ts'íinnkjink'un sisin xi nkú ts'ín behe k'un. ⁶ Xi benkjún nku nistjin, kui xi b'a ts'ín tū xi benkjúhun Nda Ntíaná. Kō xi kjine tū mí nichinehé ni, kui xi b'a ts'ín tū xi benkjúhun Nda Ntíaná. Tsjáha máb'achjíhi Ntíaná ngat'aha nichinehe. Kō xi b'éch'ohō yjohō ni xi kjine, kui xi b'a ts'ín tū xi benkjúhun Nda Ntíaná kō tā tsjáha máb'achjíhi Ntíaná.

⁷ Najmi tjin ajinná xi kuenta ts'e suba tíjña tík'uhun ko tsa kuenta ts'e suba 'mehe. ⁸ Tsa tintsuba tík'aán, Nda Ntjaná tintsuba tík'uhunná. Ko tsa túbayaá, Nda Ntjaná túbayahaná. Kui b'a maha, ndaha tsa tintsuba tík'aán ko ndaha tsa túbayaá, Nda Ntjaná ts'ená. ⁹ At'ahá kui kjuaha k'iehen Cristo ko j'áya ngáha rá ngabayoo, tu xi b'a ts'in kamaha Nda Ntjaha xuta k'ien ko xi tjintu tík'uun.

¹⁰ Ko máha ji, á ji tichasehe ri tsa nda ko tsa najmi nda tít's'ihin nda nts'ei? Ko ta, á kinte n'esjeheni nda nts'ei? Katumankjihin nga ndyjun nkin kuasehe Ntjaná mí nihi xi kin'eé nga nkúkáá.

¹¹ B'i ts'in tjit'a éhen Ntjaná:

Ahán xi tíjña tík'an, tít'su Ntjaná.

Kuasinkunch'in ngayjee xuta nginkán,

ko ngayjee ts'ínkie yjoho nga an xi Ntja.

¹² Kui b'a maha, nga nkúnkáá n'ekjas'eheén kuenta Ntjaná ni xi kin'eé.

B'i ts'in tsakúya Pablo nk'ie nga najmi tjihin nga n'endyjajihin xinkia

¹³ Kui nga najmi ta chasehe raá tsa nda ko tsa najmi nda ni xi tít's'in xinkia. Tu sa ní chasoo xi nkú ts'in najmi n'endyjajihun nda nts'o ko xi nkú ts'in najmi n'ekijnejiun ngatitsun. ¹⁴ S'ejinna Nda Ntjaná Jesu ko be nga ndaha nku ni najmi chuntí nginkun. Tunga tsa tjin xi: "Chuntí ni xu'bi nginkun", tsa kuitsu, tu nginkun ndohó chuntí niu.

¹⁵ Tunga tsa tu ngat'aha ni xi tichinei tít's'inndyjajihin rá yjoho nda nts'ei, najmi ta tín'etjohoni nda nts'ei ma. Najmi tu 'bainte

tsa tu ngat'aha nichinehi ndyjaha xuta xi k'ienntjáihi Cristo. ¹⁶ Najmi tu 'bainto tsa ch'on ts'ín kuinchjayane xuta ni xi n'ekjóhoon nga nda. ¹⁷ At'aha ni xi chineé ko ni xi s'já najmi chumi ni chjihi ra. Nk'ie ní Espiritu Santo tsjáná nga naxu kuintsubaá nginkun Ntianá ko nga s'ená kjuajyu ko kjuatsjo, kui ní ni xu'bi xi bakúchji nga ja tsitjas'enjián nga Ntianá tibatéxumaná. ¹⁸ Xi b'a ts'ín tijña nginkun Cristo, kui nij xi tsjoho Ntianá ko xuta ta nda ts'ín nchjayanehe.

¹⁹ Kui b'a maha, tinchísjaihiná xi nkú ts'ín s'ehená kjuajyu ko xi nkú ts'ín kuisinkaá xinkiá nga saáján ni xi ts'e Ntianá. ²⁰ Najmi tu ngat'aha nichinehi n'ekatsúhunni xá xi tits'ín Ntianá ajihin xuta xi ts'e. Kjuaxi kjáihin nga je nginkun Ntianá ngayjee nichine xi tjín, tunga najmi ndahá tjín tsa chinei nichine xi ts'inkijnejihin ngatitsun xuta xingisoo. ²¹ Tu sahá nda n'ei tsa najmi chinei yjo ko tsa najmi s'i binu ko tsa najmi n'ei ndaha nku ni xi ts'inkijnejihin ngatitsun já nts'ei.

²² Xi nkú ts'ín s'ejihin ni xu'bi, tu ji b'a ts'ín kas'ejihin ri nginkun Ntianá. ¡Á b'a nda tjihin ts'e xi behe k'un nga nda tjín ni xi tits'ín ko najmi tits'innijéhe ra kjuankjintak'uhun askahan! ²³ Tunga xi jo jan tímaha nga tikjine tsa mí nihi, ta kuihi tits'ínk'anji jé yjoho, at'aha najmi tits'ín xi nkú ts'ín s'ejihin. At'aha ngayjee ni xi n'eé xi fi kontra xi nkú ts'ín s'ejinná Ntianá, kui xi ngatitsun.

15

B'i ts'ín tsakúya Pablo nk'ie nga tjihin nga kuisinkaá xinkiá tu xi saájihinná ni xi s'ejinná

¹ Ñá xi ja ndjá tinchajián xi nkú ts'ín s'ejinná najmi tū n'ée ni xi tū ñá tsjo subaháná. Tjihin ni nga n'ekjáíhín xi najmi kjee ndjá tīnchajin xi nkú ts'ín s'ejinná. ² Nga nkúnkáá tjihin nga n'ée ni xi tsjohō xinkíá kō ni xi ngandahā n'ée, tū xi saájihin xi nkú ts'ín s'ejinná. ³ At'ahā kō tā Cristo najmi ni xi tsjohō kits'ín. Ni xi tjít'a ní éhen Ntjaná má b'a títso kits'ínkjáíhín: “Én ch'on tsu xi kitsúhi xutā, kui xi j'aisaténa.” ⁴ Ni xi kis'et'a nistjin nk'ie, kis'et'a tū xi kuakú nīyáhaná. At'ahā ajin xujun éhen Ntjaná sakújinná kjuatsenta kō sakú nga'yúnná tū xi chuyahā raá ni xi tsjáná Ntjaná.

⁵ Ntjaná xi tsjáná kjuatsenta kō tsjá nga'yúnná, kui xi katsjánūu nga nkuhú n'enkjínk'un xi nkú ts'ín tjíyaha Cristo Jesu. ⁶ Nkuhú kas'eya animanūu kō nkuhú katuma ntanūu. B'a ts'ín n'ekiehenu yjonūu nga tjihin kjuachánka Ntjahā kō Na'mihí Nda Ntjaná Jesucristo.

B'i ts'ín tsakúya Pablo nk'ie nga xutā xi najmi ntje judío tjeheñ rā tsichujíhín én nda tsuhú Cristo

⁷ Kui b'a maha, b'i ngján nda n'ekjáíhín ruu xinkju xi nkú ts'ín nda kits'ínkjáínnūu Cristo, tū xi s'ejña chjihi kjuachánkaha Ntjaná. ⁸ At'ahā an b'a tixinnūu. J'ai Cristo ngandahā xutā xi ntje judío tjeheñ rā. Tsakúchji nga ts'ín Ntjaná ni xi kitsú nga ts'ín. J'ai ts'íntjusun ni xi kitsúya títjuhūn Ntjaná ntje cháha xutā judío. ⁹ B'a ts'ín kō tā xutā xi najmi ntje judío tjeheñ rā ts'ínkie yjohō nga tjihin kjuachánka Ntjaná, at'ahā kō tā kui kichase nīmahā xi nkú ts'ín tjít'a éhen Ntjaná:

Kui nga xínyahana kjuachánkahí ajihín xutā xi tjíntu asunntee,

kō séhe nga ts'intsoho.

¹⁰ Kō b'a tā ts'ín tji't'a ya:

Jun xutā xi tintsu_{bo}o asunntee, n'etsjokoo xutaha
Ntjaná.

¹¹ Kō b'a tā títsu sa:

N'etsjohoo Ntjaná ngayjee xutā xi tjíntu asunntee.
Chanink'o Ntjaná ngayjee xutā naxinantá xi tjín.

¹² Kō b'a tā ts'ín y'ét'a nda profeta Isaiá:

Stjúkjá nda xi kama kjamaha Isai,
nda xi kj'uaítexumaha xutā xi tjíntu asunntee,
kui kama 'yún tak'un xutā.

¹³ Ntjaná xi tíma 'yún tak'aán, kui xi
kats'intsejinye animanuu kjuatsjo kō kjuajyu, jun
xi s'ejinnuu Ntjaná. Katsjá nga'yúnnuu Espiritu
Santo tu xi tu nku ndjáhá kuinchajihinnu ni xi
tíchuyóhoo.

*B'i ts'ín tsakúya Pablo nk'ie nga kui xi nku nda
postru xi ts'inxájihin xutā xi najmi ntje judio tjehe
ra*

¹⁴ Behe k'an, já nts'e, nga kitsejihinnuu kjuanda
kō kjuankjink'un, tu xi kama k'uai niyáha ruu
xinkiu. ¹⁵ Tunga tjíhín ni xi tíma k'an tít'et'á
xujunnuu ei tu xi najmi n'echayahanu. At'aha
Ntjaná kitsjana kjuanda xu'bi ¹⁶ nga an xi
ts'inxát'aha Cristo Jesu ngandaha xutā xi najmi
ntje judio tjehe ra. Tíb'enijmíhi én nda tsuhu
Ntjaná xutā xi najmi ntje judio tjehe ra tu xi
kuichú maha chje xi tsjohó Ntjaná, chje xi títs'ín
tsje Espiritu Santo.

¹⁷ Tsjo mana nga nchjanijmíya xá xi kitsjana
Cristo Jesu nga ts'inxát'aha Ntjaná. ¹⁸ At'aha
najmi ma k'an nchja ni xi kj'ai, tu nkuhú xi

nkú ts'ín ts'ínchjénna Cristo tú xi kuínt'é'éhen rá Ntíaná xutá xi najmi ntje judio tjeheñ rá. Cristo ts'ínchjén ntána kó xána ¹⁹ kó nkjin tíkjá kjuankjún xi bakúchji nga'yúhún. Nga'yúhún Espiritu Santo b'a tít's'ín. B'a ts'ín jehena nga y'enijmíá én nda tsuhu Cristo nanki Jerusalen kó santaha má nga 'mi Ilirico.

²⁰ Y'enijmíá én nda tsuhu Cristo ante má nga najmi kjee ch'a b'énijmíhi. B'a kits'ian at'aha najmi kama mjena y'esún saha xá xi kik'atuts'ihin xutá xi kj'ái. ²¹ Tú sa ní tít's'ian xi nkú ts'ín tjt'a éhen Ntíaná: Xi najmi kjee 'miyaha yáha kui, kui xi skuéhe. Kó xi najmi kjee nt'é yáha kui, kui xi kamankjihin.

B'i ts'ín kitsúya Pablo nk'ie nga mjehe nguaisehe xuta ninku Roma

²² Nkjin niyá najmi kisakú niyána nga kama kfínseheñuu, ²³ tunga nd'ai ja kama ndjuúna xá xi tít's'ian ante xi tjín ei kó tá ja tjihin nú nga mjena kfínsenuu. ²⁴ Kui nga mjeheña nga skuenuu nk'ie nga kfíán España, at'aha mjena yó kfian. Tsjo kamana nga kúátejñajinnuu chuba nistjin. Nk'ie nga kj'ua yó, tisinikonú nga ts'inndjaá niyána.

²⁵ Tungá nd'ai nanki Jerusalen tífia. Xutá xi kikj'áts'e Ntíaná kfínsinka yó. ²⁶ At'aha ngayjehe k'un xutá ninku xi tjín ante Macedonia kó ante Akaya incha kits'insun toon tú xi ts'ínkjihí rá xutá x'an xi kikj'áts'e Ntíaná xi tjintu Jerusalen. ²⁷ Tsjo kamaha nga b'a incha kits'ín. Kó kjuaxi nga tjeheñ ts'e xutá xu'bo. At'aha nd'ai tít's'ínkjáihin xutá xi najmi ntje judio tjeheñ rá ni xi ts'e Ntíaná, ni xi Ntíaná kitsjáha xutá xi ntje judio tjeheñ rá. Kui nga xi najmi ntje judio tjeheñ rá tjihin nga

kuasinkohō nga kuakjányako xuta xi ntje judio tjeheñ ra ni xi tjiñin ei asunntej. ²⁸ Kui b'a maha, nk'ie nga ja kama ndjuúhuna xá xu'bi ko nk'ie nga ja ts'inkjas'en ni xi kama ñjakúu, as'aíhí ní kfíán España ko kj'ua má nga tintsuḅoo. ²⁹ Be nga Cristo tu xí ndahá ts'íinkoná nk'ie nga kama ñjakáá.

³⁰ Jun já nts'e, ngat'ahā Nda Ntíaná Jesucristo ko ngat'ahā kjuatjo xi tsjáná Espiritu Santo tibankinu nga chubantjainú nginkun Ntíaná. B'a ts'ín n'ekohonú nga'yún. ³¹ Tinchíhuu nga najmi tu kasatějña xuta xi najmi s'ejihñ Nda Ntíaná xi tjíntu ante Judea. Ko ta tinchíhuu nga xuta xi kikj'áts'e Ntíaná xi tjíntu nanki Jerusalem nda ts'ín ts'íinkjálhñ ni xi kfíinkohō. ³² B'a ts'ín tsjo tjiñinna nga kuichusenū ko ts'ínkj'áíya ichí kutju ajinnū. B'a katuma tsa b'a ts'ín mjehe Ntíaná. ³³ Ntíaná xi tsjáná kjuajyu kat'ejñajinnū ngatentoō. B'a katuma.

16

B'i ts'ín kikjaniñaha Pablo xuta ninku xi tjíntu Romā

¹ Be na nichjaá Febe. Ninku xi tjín nanki Cencrea ts'ínxát'a. ² Ngat'ahā Nda Ntíaná nda n'ekjóhōn xi nkú ts'ín tjiñin nga n'ee ñá xi xutaha Ntíaná mahaná. Tisinkoo nga tjohoon tu mí nihí ni xi machjéheñ. At'ahā nkjin nkjún xuta tsasinko ko ta tsasinkona.

³ Tjohoon kjuasuniñana Priscila ko Akila, xi ta títs'ínxát'ahā Cristo Jesu xi nkúhu an. ⁴ Najmi incha kitsankjún tsa kuayá ngat'ana. Títsjahā máb'achjílhi ngat'ahā ni xi incha kits'ín. Najmi tu nku an xi

b'a tixian. B'a ta tinxha tsu ngayjee xuta ninku xi najmi ntje judio tjehe ra.

⁵ Tjohoon kjuasuniñana xuta ninku xi ma ñjakú ni'yaha Priscila ko Akila. Tjohoon kjuasuniñana Epeneto. 'Yún tjona ndo. Ajihin xuta xi tjin ante Asia, kui xi tjun kis'ejihin Cristo. ⁶ Tjohoon kjuasuniñana Maria. 'Yún tse xá xi kits'in ajinnuu. ⁷ Tjohoon kjuasuniñana Androniko ko Junias, xi ta ntje judio tjehe ra. Ta kis'eya'yunka nubayá jóo. Ta já postruhú jóo ko yankjún. Kui tjun kis'ejihin Cristo nga an.

⁸ Tjohoon kjuasuniñana Ampliato. 'Yún tjona ndo at'aha ta s'ejihin Nda Ntjaná. ⁹ Tjohoon kjuasuniñana Urbano, kui xi nkúhu jin ta Cristo tits'inxát'aha. Tjohoon kjuasuniñana Estakis. 'Yún tjona ndo. ¹⁰ Tjohoon kjuasuniñana Apeles, xi ja tsakúchji nga 'yún s'ejihin Cristo. Tjohoon kjuasuniñana xuta xinkjin Aristobulo.

¹¹ Tjohoon kjuasuniñana Herodion, xi ta ntje judio tjehe ra. Tjohoon kjuasuniñana xuta xinkjin Narciso, xi ta s'ejihin Nda Ntjaná. ¹² Tjohoon kjuasuniñana Trifena ko Trifosa, xi ta tits'inxát'aha Nda Ntjaná. Tjohoon kjuasuniñana Persida, xi 'yún tjona ko xi 'yún tse xá xi kits'in at'aha Nda Ntjaná tjenki.

¹³ Tjohoon kjuasuniñana Rufo, xi Nda Ntjaná j'ajihin, ko naaha, xi ta ko an basehe xi nkúhu tsa naana maha. ¹⁴ Tjohoon kjuasuniñana Asinkrito ko Flegonte ko Hermes ko Patrobas ko Hermas ko já nts'eé xi tjintujihin. ¹⁵ Tjohoon kjuasuniñana Filologo ko Julia ko Nereo ko na nichja ko Olimpás ko ngayjee xutaha Ntjaná xi tjintujihin.

16 B'i ngján súnĩñoḥo xinkju. Títs'ínkjinu kjuasuniña ngayjee xuta ninku xi ts'e Cristo.

17 Jun já nts'e, tĩbankinu nga chũhun yjonu xi bakjánya xuta ko xi ts'ĩndyjajihin xuta. Kui xi fi kontraḥa ni xi ja tsinchiyó. N'e t'axĩhun yjonu xuta xu'bo. 18 At'aha xi b'a títs'ín najmi títs'ínxát'aha Nda Ntĩaná Jesucristo. Ni xi tsjo níhi tĩncha bangisjai. Ēn sin én nda nchja nga b'anachaha xuta xi najmi kjee 'yún mankjihin ni xi ts'e Ntĩaná.

19 Ya tu má xi tjeḥén ni nga tĩnu'yá'ón. Kui nga tsjo mahana ngat'a ts'ajun ko mjena nga 'yún kamankjin sanu ni xi nda ko nga kuankín t'axĩhun ni xi najmi ndoo. 20 Ntĩaná xi tsjáná kjuajyu, kui xi ts'ín nga n'e nganoḥo ndanindoo. Kas'enu kjuandaha Nda Ntĩaná Jesucristo.

21 Timoteo títs'ínkjinu kjuasuniña. Kui xi tjenkona nga tĩn'exát'aihi Jesucristo. Ta títs'ínkjinu kjuasuniña Lucio ko Jason ko Sosipater, xi ta ntje judio tjeḥen ra.

22 Ko ta an Tercio xi títs'inntá xi nkú ts'ín tĩtsuyana Pablo, títs'ínkjinu kjuasuniña, an xi ta s'ejinna Nda Ntĩaná.

23 Gayo títs'ínkjinu kjuasuniña. Ni'yaha tĩjña. Yo má nga ma ñjakú ngayjee xuta ninku. Ko ta títs'ínkjinu kjuasuniña Erasto, xi tjihin xá nga f'átjo toohon xuta nantio, ko ta nda nts'eé Cuarto.

24 Kjuandaha Nda Ntĩaná Jesucristo kat'ejñajinnu ngatento. B'a katuma.

B'i ts'ín kits'ínkje Pablo xujin

²⁵ Kan'etsjohō Nt̃iáná. Kui xi kāmaha nga ndjá ts'íínkincháñu xi nkú ts'ín t̃j̃ña én nda tsuh̃ Jesu-cristo xi t̃ixinya kō t̃ib'enijm̃iá. T̃is'ej̃ña chji nd'aj̃ ni xi kis'ej̃ña 'ma nkúhu nú chá ján. ²⁶ Ja t̃is'ej̃ña chji nij xi nkú nga t̃ítsu xujuh̃un já profeta kō t̃ín'ekint'é ngayjee xut̃a xi t̃j̃ín asunntee. B'a kitsú Nt̃iáná xi t̃j̃ña t̃ík'un sín nga b'a n'e t̃u xi s'ejih̃in r̃a kō kũint'é'éhen r̃a ngayjee xut̃a.

²⁷ Ngat'ah̃a Jesucristo kas'ej̃ña chji síhin kjuachánkaha Nt̃ia, kui xi nku tutũu kō xi nkjink'uun. B'a katuma.

Éhēn Ntīaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

e05183c2-7c34-5cdd-8c78-15ea51bd8cbb